

東
華
續
錄

東華續錄

咸豐四十二

臣王先謙敬編

臣陶潛宣恭校

十一月丙寅朔諭內閣戶部奏山東河南應解京餉請嚴飭解交一摺山東河南兩省應解京餉銀兩經戶部屢次奏催日久未據報解各該撫身任封疆當此需餉孔亟之時仍復任意遷延實屬疲玩已極崇恩英桂著先行交部議處仍著該撫等按照戶部所奏自本年六月爲始將每月欠解銀五萬兩迅速派委妥員如數起解勒限於十一月內到部儻仍前延宕卽著該部據實嚴參以儆玩泄至山東省地丁銀兩積欠至一百七十餘萬尤屬不成事體前經降旨飭催報解並指撥東三省俸餉各款著崇恩一體迅速起解毋誤要需致干重咎○河道總督楊以增奏捻匪張彥等

於本年七月間前赴山東嶧縣滋擾旋又駕船五十餘隻至銅山縣之青山泉肆行焚掠經徐州道王夢齡飭派文武兜捕將大股擊散臣復揀派通判于贊隨同怡良原派之知府毓彬等馳往該處協拏餘匪茲據署徐州鎮興慶與王夢齡稟稱先將張彥之母張趙氏妻張王氏獲案並將張彥等板橋小塔山匪巢燒毀探知張彥杜四李大選遁入邳州蘭山一帶令兵勇佯爲撤退設伏要地張彥等聞官兵已退復至耿家灣委員毓彬等與地方文武帶兵兜剿該匪等開放槍礮我兵奮勇齊進擊沈匪船十餘隻斃匪百餘名生擒二十五名張彥等駛船亂竄我兵分路跟追該逆逃至睢甯縣鮑家樓改裝登岸經知縣高丙謀率同練勇圍捕張彥被擒練總鹿肇侯等在朱李湖獲杜四候補直隸州知州張夢麟等在銅邳交界之宗家廟亦將李大選擒獲均經正法又蕭縣

有永城擒匪宋萬周大幅各聚眾千餘劫掠亦經王夢齡與前任
徐州鎮聶金鏞派兵往拏斃匪百餘生擒周大幅正法宋萬復率
黨數千在永宿交界鐵佛寺盤踞該鎮道等帶領兵勇馳抵該處
將宋萬擒獲正法餘匪潰散頃據探稟河南虞城縣有永毫擒匪
千百成羣肆行焚掠該處逼近江境見飭徐州鎮道確探嚴防勿
任竄入 上諭楊以增奏遵旨飭拏巨匪悉數就擒一摺江南銅
山豐沛地方有土匪張彥等聚眾擄掠先經徐州道王夢齡派員
兜捕擒獲多名楊以增復派通判干贊等隨同怡良原派之候補
知府毓彬會拏已將張彥杜四等先後於耿家灣鮑家樓等處擒
獲並擊沈匪船多隻又經在籍團練之候補直隸州知州張夢麟
署邳州知州焦肇瀛在銅邳交界地方接獲逆首李大選均卽正
法該匪等結擒搶劫實屬罪大惡極見經該地方文武紳團水陸

兜拏悉數弋獲均屬著有微勞所有出力各員著准其擇尤保奏毋許冒濫○諭軍機大臣等戶部奏庫款不敷支放請飭山西省籌款趕解等語上年因部庫積存不敷四年分支發之用經戶部奏明於山西省地丁項下豫籌銀一百七十萬兩嗣經該省解過銀八十萬兩見據該撫咨稱晉省藩庫無款可籌下忙錢糧尙未收有成數俟徵收後卽行起解本年山西省接濟部庫以及指撥各省軍需款項較多所稱藩庫支絀自係實情惟見在部庫應放之款需用浩繁仍著恆春悉心籌畫無論何款內暫行措銀四五十萬兩務於十一月內解京以供支放俟徵收下忙錢糧陸續歸款至捐免充商銀兩業經該省解過銀一百五十七萬兩其餘應繳銀兩並著飭屬催繳趕於年內解京將此由四百里諭令知之○諭沈祖懋奏徵郡防堵緊要需員督辦一摺徵甯爲江浙門戶

池州所屬青陽石埭東流建德貴池等縣皆與徽郡西境接連前此逆船由大通河登岸並蕪湖賊船駛進內河俱經黃宗漢派令兵勇前往應援並派護杭嘉湖道徐榮前往徽州督辦防務茲據該學政奏稱黃宗漢欲令徐榮回杭而徽郡情形緊要必得統率有人事權方有專屬等語自係實在情形著黃宗漢何桂清仍畱徐榮辦理徽郡防堵事務毋庸更易生手致有疏虞見在曾國藩等水軍已收復蘄州追至九江即可直達安慶托明阿向榮和春福濟等亦皆諭令分兵扼要協力進剿該逆奔竄無路恐其由徽甯窺伺江浙必須嚴密設防未可稍存大意黃宗漢不得因擢任川督置身事外何桂清雖甫經到浙亦當悉心籌畫以副委任將此由六百里諭令知之○丁卯諭內閣楊需奏參帶兵官員疏懈無能等語副都統魁玉總兵楊昌泗督帶兵勇駐紮蘄州之三道

橋地方於敗匪潰竄之時不能奮力扼截致官兵有驚散情事雖經事後收集跟蹤追剿究屬約束不嚴疏於防範魁玉楊昌泗均著摘去頂帶以示薄懲儻再不知愧奮卽著嚴參懲辦○諭軍機大臣等前因曾國藩等水陸官軍自蘄州直下逆匪敗竄廣濟黃梅當諭令托明阿向榮等撥兵向上迎擊截其分支四竄之路並嚴飭師船迅速上駛乃本日向榮所奏師船尚在浦口守風逆賊橫江橋鍊尙未攻斷同一鐵鎖攔江伎倆何以該逆用之田鎮而曾國藩等一戰破之用之九洑洲而托明阿等屢攻不破殊不可解見在烏江一帶賊壘經袁甲三等派委恩錫張光第督兵進剿業已平毀無餘惟因水路無兵接應以致敗賊揚帆逃逸若吳全美葉長春能於攻破洲地賊營後卽日駛赴上游自可水陸夾擊不但可爲楚師接應並可斷絕南北岸逆賊來往應援乃任意遷

延水陸隔絕殊爲可恨著托明阿向榮卽行嚴飭該總兵等剋日起碇將前次指撥各船悉數開赴上游沿江剿洗直抵蕪湖毋許再有推諉至曾國藩等斬斷田鎮賊鍊係分船四隊以一隊專管燬斷鐵鎖以一隊圍攻其護鎖之船使之不能相救江路一開四隊戰船皆可分投焚剿下游江面較寬施展更易爲力江南北兩營師船之外尙有多槳快船豈不能酌量分隊倣照辦理總由水師將弁不思設法以致賊鍊未能卽破而我軍復自爲鎖纜攔截上游似此相持將使紅單各船終無上駛之期徒以俟湖北師船一到合力夾攻爲詞豈湖北一軍之外各營水師人員皆應坐視旁觀束手無策耶著托明阿向榮等於接奉此旨後卽將攔江賊鍊迅速攻破斷不准再有遲延並將籌辦情形速行具奏如水師員弁有意玩延卽著嚴行參奏其和含等處應如何分撥兵勇與

袁甲三所派兵勇合力攻剿之處並著托明阿等妥速籌辦但能洗淨一處卽少一北竄之路並非專顧瓜州金陵遂爲該大臣等職分已盡也將此由六百里加緊各諭令知之○袁甲三奏永亳擒首蘇添幅等由豫省竄回亳州之新集五馬溝大顏家集等處分股盤踞嘯聚各路匪徒號稱萬餘經知府張家駒副將朱連泰等督率兵勇進剿行抵寺兒集該匪已由新集蠶擁而來我軍分隊進攻該逆分股抗拒人數倍於官軍西股賊匪先放大礮未傷我軍而賊中火藥被轟都司戴世熙卽催兵施放連環槍礮一擁而進賊眾大敗東北兩股合併迎拒朱連泰奮勇當先張家駒繼之催督兵勇齊進賊匪潰散戴世熙朱連泰等分路窮追搜殺十餘里殲賊五百餘人斃騎馬賊首三人生擒二十餘人該匪等經此痛剿皖豫軍威大振惟擒首蘇添幅未知去向各路探報五六

十里內均無匪蹤惟西北王家岡丁家花園等處尙有餘匪臣飛
飭該文武等乘勝追剿務將蘇添幅擊獲並將亳州境內先行掃
蕩俟豫省兵到卽行協剿並嚴飭潁州府陸希湜趕緊前往會同
辦理上諭袁甲三等奏進剿沿江逆匪平毀烏江一帶賊壘並
剿辦逆匪懇請飭催河南援兵各摺片已寄諭英桂趕緊撥兵赴
皖相機進紮正陽六安等處不得株守豫境矣據英桂奏見擬將
信陽三關防兵撥赴陳州歸牛鑑調遣爲近駐潁州遠扼正陽之
計並稱信陽遣撤兵勇撥赴歸德獨多派委道員張維翰接辦防
剿袁甲三酌量何處空虛亦可徑行檄飭牛鑑張維翰迅速派兵
前進如該員等心存畛域有意逗畱卽著袁甲三據實參辦惟曾
國藩等水陸各軍卽日可抵皖境沿江賊黨勢必紛竄腹地袁甲
三雖駐紮臨淮所有北路各州縣均須面面顧到亦不得泥守一

隅不復設法籌及何處情形喫重卽迅速督兵前往扼截萬不准有賊蹤踰淮而北一面嚴飭陸希湜趕赴市兒集一帶會同張家駒等迅將亳州境內捻匪搜捕淨盡務將捻首蘇添幅擒拏懲辦毋令日久稽誅又致句結蔓延該員職司守土無論所屬何處州縣伏莽未靖皆不容有所推諉卽豫省捻匪一有竄入境內亦陸希湜防堵不力之咎著飭知該員與帶兵各員務與歸陳各路調到兵勇聯絡聲勢或應合剿或應分捕亟行協力商辦以期淨絕根株至全滁和含各處賊營聯貫直接東西梁山前已諭托明阿向榮等通籌分兵攻擊迅飭師船上駛由蕪湖荻港徑達安慶並令武慶等力守浦口兼與恩錫張光第併力籌剿本日復諭令設計斷賊鐵鎖以通江路和春福濟圍攻廬州日久無功已屬罪有應得若能與托明阿等派到兵勇互相接應將東路賊匪先行掃

蕩則廬城賊勢益孤更屬易於得手並須時時與袁甲三知會不得令勦餘潰匪潛謀北竄若頓兵城下以爲藏身之固不復兼籌大局福濟巡撫皖省固已責無旁貸和春專勦皖賊並未能迅速辦理國法具在朕不能爲該提督等稍從寬宥也將此由六百里加緊各諭令知之○諭曾國藩水陸大軍從田鎮進攻九江指日可抵安慶逆賊被勦緊急必由陸路紛竄皖省重兵聚於廬舒凡正陽六安等處均屬空虛袁甲三雖駐臨淮兵力較單勢難兼顧河南南路見已撤防正可撥兵前往以資截勦茲閱英桂奏報僅將信陽三關兵勇撥赴陳郡其或進駐潁州或往扼正陽尙俟咨商妥辦是豫省之兵見在全未出境著英桂卽將撥赴陳郡兵勇酌量調往正陽六安等處相機協勦至邱聯恩駐紮光州牛鑑駐紮陳州與其遠爲聲援何如帶兵前進之較爲得力並著英桂斟酌

酌情形將該二處防兵如何分派赴皖迅速籌辦該撫亦應出省防期不得株守省城至歸德爲上年逆匪北竄之路地方極爲喫緊徐廣縉請假後張維翰是否可恃永毫捻匪見經袁甲三等派員追擊仍著英桂嚴飭該地方文武會剿務將捻首蘇添幅等拏獲毋稍貽誤將此由六百里加緊諭令知之○戊辰冬至祀天於圓丘○庚午以捐輸軍餉永廣陝西朝邑縣學額七名涇陽渭南各三名邵陽二名咸甯富平三原韓城蒲城岐山各一名○壬申諭內閣御史尹國珍奏揀選族襲佐領請將控告上司之員扣除等語向來屬員訐告上司本有立案不行之例其或事經查辦情節虛誣亦皆按律懲辦原以儆刁風而維政體此案理藩院筆帖式瑞全呈控該旗都統揀選不公旣經欽派王大臣等查訊確實是該筆帖式身負冤抑據情呈訴與事不干已肆行訐告者

不同何得因負冤控告目爲遲刁遽行扣除轉致不符定例所有
瑞全及其子承綺等均著毋庸扣除仍著該旗都統等遵照前旨
秉公揀選毋稍徇徇○以奏報遲延降四川總督黃宗漢二品頂
帶仍畱任○調浙江兵一千名赴廣東剿賊○癸酉諭軍機大臣
等價格林沁等奏逆匪出巢痛剿獲勝一摺賊匪自上次誘出以
後該大臣等並未實力進攻卽初一等日三次撲我營盤均經擊
退亦不過小有斬獲豈得謂兇猛之氣大遂於前該逆連日沿濠
窺伺意圖出竄乃稱防守甚嚴不敢很撲似此遷延時日稍有鬆
懈必致竄突他處見在天氣嚴寒各將士冒冷執戈朕每一動念
輒爲心惻該大臣僅以圍困爲得計試問守而不攻豈能殲茲醜
類況軍營衣領等項向恃捐輸若不趕緊攻剿勸捐斷難爲繼連
鎮並無城郭何至抗拒數月未能破其巢穴該大臣旣知士卒艱

苦情形卽當激勵軍心迅圖攻取若必待逆賊出巢始行轟擊豈堅匿不出卽束手無策耶隆冬歲暮風雪在所不免此次旣乘風奔撲則其狡謫伎倆必更伺我之隙肆其詭謀與其設計圍困不如迅速進攻該大臣等務當及早蒞事以慰朕懷不得自謂調度無能致令該逆久稽顯戮也將此由六百里加緊諭知僧格林沁並諭西凌阿知之○諭勝保等奏續調官兵來營連日接仗情形並擬明挖地道安用地雷合圍攻剿等語此次賊匪乘夜撲營拉開樹柵拋擲火彈雖經官兵擊斃甚多而礮營帳房業已被燒並於二十七八等日屢次出撲可見該逆思竄甚亟勝保等見籌明挖地道於城根安用地雷冀得轟開城垣著卽迅速妥辦惟賊情旣已窮蹙斷不肯束手待斃該大臣等一面籌挖地道一面仍當併力進攻勿徒恃有地雷轟擊復蹈從前呂公車等覆轍勞費無

效徒延時日該大臣等務當激勵將士速籌進取之計見在官兵
業已到齊無可停待天氣沍寒士卒疲憊勝保以數月之功效此
區區之城而不下從前勇敢之氣日就銷磨殊不可解著卽迅圖
克復出其不意四路合剿毋再遷延自干重罪將此由六百里加
緊諭知勝保並諭德勒克色楞善祿崇恩知之○先是閩浙總督
王懿德等奏銅禁綦嚴諸多未便請收五斤以上銅器其五斤以
下者速弛其禁至產銅之地不止雲南一省陝西商州有人呈請
開辦銅礦請飭該督撫認真採辦下軍機大臣會同戶部議至是
奏收繳銅器應如所奏辦理五斤以下銅器仍准民間照常使用
其產銅之區請飭陝西巡撫迅卽委員確查以憑覈辦從之○甲
戌諭內閣向榮奏已革提督屢立戰功懇請免罪等語已革江南
提督鄧紹良前因在鎮江失守營盤降旨革職畱營效力茲據向

榮奏稱該革員自撤回大營後隨同帶兵攻勦本年馳援東壩轉戰太平攻奪采石無不身先士卒出奇制勝尙知愧奮鄧紹良著免其治罪仍責令帶兵勦賊如果始終得力准其酌量保奏候朕施恩儻仍不知奮勉卽著據實嚴參毋稍瞻徇○乙亥諭內閣福濟奏參劣紳越境擾害擅殺妄爲請革職嚴訊一摺安徽壽州捐納員外郎孫家泰膽敢在六安州地方冒稱欽差假託防勦私用官刑擅殺四命謬妄已極紳士辦理團練原以保衛鄉閭該地方設有兇惡棍徒亦應鳴官究辦似此膽大妄爲實屬大干法紀若不從嚴究治何以戢殘暴而儆效尤孫家泰著卽革職交福濟嚴行審訊按律懲辦毋稍寬縱○諭各省紳士辦理團練或經特旨派辦或由督撫及京員保舉原爲其熟悉情形禦賊保家可助官兵之不逮自軍興以來各省舉行團練紳士中實能秉公盡力捍

衛閭閻者不乏其人乃本日據福濟奏安徽在籍員外郎孫家泰假託團練擅殺四命殊堪詫異因思各省紳士團練原屬幫同地方官辦理卽或職分較大總歸督撫統率如有惡棍土豪擾害地方仍應控官究辦何得擅自用刑罔顧法紀嗣後各省團練官紳務各懍遵迭降諭旨於一切勸捐練勇事宜均會同地方官和衷籌辦儻該地方州縣各存意見致相掣肘著該督撫嚴行參奏若該官紳等藉團練爲名營私擾累並著隨時稽查一併參辦將此通諭知之○和春等奏攻剿廬州獲勝情形得旨雖先後斃賊千餘名實未能大挫兇鋒似此曠日持久爲蕞爾廬城牽掣大兵太覺不成事體明攻暗襲迄無成功汝等屢次奏報毫無把握負恩糜餉罪責奚辭著仍剋日攻復城池盡殲醜類勿再敷衍入奏也○丙子諭軍機大臣等駱秉章奏分路勦辦犯境粵匪獲勝一摺

另片奏探防調援各情形此次廣東廣西兩省匪徒同時竄撲湖南邊界分擾桂陽道州等州縣猖獗之勢幾於應接不暇均經在事文武督率兵勇分投堵剿轉危爲安該省官紳協力同心以少禦眾各員弁兵勇亦能人人用命破陣衝鋒具徵敵愾同仇實堪嘉尙見在本省大兵多半隨征東下而鄰省兵力亦無可分撥各路竄匪雖經擊退仍須隨時激勵鼓舞以期捍衛地方該撫籌防東西兩路以郴桂永州爲重分飭江忠濟王鑫等統兵前往堵截彼此互爲策應所辦亦是惟連州賊勢甚熾韶郡見復被圍其灌陽賀縣之匪仍窺伺永明江華一帶兩路並重若專事籌防自不如相機協剿較易爲力前此調赴韶州援剿之辰沅官兵一千名當已行抵該郡能先將此股剿洗不但驛路疏通並可移此有用之勇以次援應他處著駱秉章妥籌全局既須固守本境藩籬勿

令賊蹤復行闖入仍應無分畛域隨時飛飭帶兵文武及各地方官防勦兼施實力堵遏其粵東省城近日能否解圍並此外各屬賊情均著探明馳報以慰廬懷將此由六百里加緊諭令知之○以湖南防勦出力賞同知王鑫花翎餘升賞有差○丁丑 上詣

大高殿祈雪○己卯以江蘇清河縣練勇出力賞知縣吳棠花翎餘升補有差○庚辰楊需奏賊目偽丞相羅大綱偽指揮陳姓率安慶賊匪數萬竄入黃梅分踞廣濟知南岸官兵已下攻九江意欲乘北岸空虛上竄蕪黃窺伺武漢塔齊布自南岸率領陸軍渡江會勦魁玉楊昌泗由清水河西路進攻殺賊二百餘名追至崇陽橋隨勦隨進抵廣濟縣紮營塔齊布與羅澤南等由菩提壩南路進攻賊匪分路來撲我軍奮力衝殺賊勢潰散我軍乘勢縱擊陣斬黃衣賊目一名先後擒斬一千餘名收復廣濟縣城餘賊

竄往黃梅復又屯聚距廣濟七十里之大河鋪官兵拔營前進行抵雙城驛賊匪二三萬人分三大股來犯塔齊布督同周鳳山羅澤南等分中左右三路迎擊痛加剿洗賊眾披靡魁玉楊昌泗後隊繼至乘勝追逐與塔齊布大軍縱火焚燒賊營四座殺賊三千餘名生擒九十餘名奪獲器械旗幟多件兵勇進逼城下復斬獲千餘名生擒一百餘名當將黃梅縣城克復餘匪散竄楚北境地一律肅清其分竄九江安慶賊匪經李孟羣彭玉麟等約會江西陸軍水陸並攻李孟羣親督戰船直趨九江城下見城外賊築礮臺三座江面有快礮船六隻雜船七八隻對岸築礮臺二座江心大沙洲紮營一座極爲堅厚又大木簰一座周圍築牆開孔安礮甚多簰下大戰船一隻又快礮等船三隻雜船百餘隻依泊洲後圍截江路李孟羣督兵衝過賊營進攻沙洲直趨上游焚燒賊船

數隻殺賊數十人當將城外大小賊船一併燒盡轟斃礮臺內賊
匪無數復溯流回攻北岸沙洲轟斃陸賊數十人揮砍船上紅衣
賊目落水又燒船數十隻將快蟹各船槳舵坎斷轟斃黃衣賊首
各船奮勇前進環攻簞下大船擊斃賊匪多名力戰四時始行收
隊惟聞江西陸兵在十塘鋪等處接仗尙未得手臣行抵黃州計
塔齊布必由黃梅出小池口與曾國藩會合擬令頭隊由黃梅進
攻宿松太湖協攻安慶臣親督後隊駐廣濟黃梅之間以爲聲援
並派兵勇分駐蘄州田鎮以通南岸聲勢惟江西水陸各軍旣未
得手賊踞九江而竄擾瑞昌南岸興國一帶情形喫重曾國藩見
駐武穴臣擬前往面商機宜妥籌辦理 上諭軍機大臣等所敘
進攻九江情形似該郡賊黨尙復不少塔齊布渡江而北南岸官
軍卽不能得手是江西陸路兵勇殊不足恃塔齊布仍須渡回南

岸攻克九江方能水陸會齊順流東下若塔齊布一軍由宿松太湖徑抵安慶而南岸兵力較弱則九江不能卽克水軍爲所阻截未免聲勢隔絕此時曾國藩當已與楊霽會晤籌商詳細情形諒已奏報在途著卽南北兼籌勿致顧此失彼楊霽摺內有逆蹤竄擾瑞昌之語未據詳晰聲敘如果係大股分竄則該逆仍欲上窺湖北興國大冶一帶尙未可恃以無虞楊霽旣駐黃梅廣濟之間與瑞昌僅隔一江自應酌量分兵渡江會剿先通水師之路然後能上保楚境下擣皖城該督前奏除桂明李光榮兵勇撤回外北岸兵勇尙不下一萬六千人與其分駐田鎮蘄州遙作聲援何如合力進攻杜其繞竄儻南北兩岸專恃一塔齊布奔馳追剿則湖北江西兩省官兵豈不均成虛設耶江西派出營剿之臬司惲光宸前任總兵趙如勝距省稍遠亦可由曾國藩等就近調度俾有

稟承不可稍存畛域貽誤事機將此由六百里加緊各諭令知之
○辛巳諭軍機大臣等英桂奏派兵赴皖令牛鑑進駐潁州並抽
募兵勇赴陳督防一摺該撫見已添調副將希拉布等所帶山西
兵赴牛鑑行營聽調加以前調赴陳兵勇八百餘名正陽一路足
資控扼究須與袁甲三隨時知照聲勢方爲聯絡邱聯恩兵勇既
未能全數赴皖卽當飭令該鎮將霍邱等處捻匪迅行剿滅不得
以駐紮光州爲名頓兵安閒之地致所屬商固一帶匪黨橫行釀
爲腹心之患六安見有添調之陝甘官兵前往駐守雖情形未甚
喫重然亦須相機協剿毋但一意設防至該撫見擬抽兵募勇出
省爲牛鑑後路應援惟歸德尙有捻匪未除或應駐陳州或應赴
歸德英桂當體察事機緩急親往督辦但攘外必先安內賊氛不
靖固當示以兵威至地方偶有刁民聚眾滋事則專賴管轄之道

府州縣善於彈壓平時撫馭有方必不至抗官滋事之案層見疊出若因抗納錢糧卽須移兵動眾徒事煩擾且恐激而生變該撫當嚴飭蔣啟敷等究其起釁之由剛柔相濟總期分別良莠擇尤懲治不至釀成事端動勞兵力方爲善策英桂統轄全省所屬稍有蠢動卽係該撫之責不得稍存大意將此由五百里諭令知之

○河南巡撫英桂奏近日霍邱擒首丁心田由楚北遣散復聚黨數千分擾光息總兵邱聯恩馳剿擒斬多名另股巨匪李兆受時率夥黨至商固地方焚掠村莊尋仇殺掠歸德又有亳州擒首蘇添幅等疊肆焚搶臣派撥兵勇二千餘名前往剿辦袁甲三派兵會攻十月二十六七等日道員張維翰親督兵勇分赴虞夏商永等縣圍剿捕獲擒首楊新位等二十餘名復於二十九三十等日與皖省會哨合剿在亳境大顏家集擒獲擒首劉根支牛田三丁

三等二十六名又獲擒首韓金鑑閻全等二十九名潁州府知府
陸希湜等拏獲首匪李秉倉李秉瞬等十名大股解散民悉安業
臣嚴飭地方文武會同皖省各員合力兜剿務將蘇添幅等按名
拏獲臣前帶信陽兵勇俱已分撥出防見於省中另行抽兵募勇
一俟調齊卽帶赴陳州督剿報聞○予湖北被戕州判魏作霖祭
葬世職○壬午曾國藩塔齊布奏逆匪自田家鎮經官軍痛剿僞
檢點陳玉城統蘄州之賊竄踞廣濟僞燕王秦曰綱統田家鎮之
賊竄踞黃梅及九江之小池口等處而僞冬官丞相羅大綱又帶
長髮賊萬餘分布黃梅境內各要隘臣塔齊布督同羅澤南等統
帶陸軍分路進剿先後殺賊一千二三百名當將廣濟縣城收復
李孟羣統帶水師各船進抵九江城外分攻南北兩岸血戰四時
之久燒毀賊船四十餘隻殲斃賊匪五六百名搶獲黃旗黃繖紅

衣槍礮子藥不計其數千總蘇勝把總鄭沐軍功李金樑均中礮陣亡伏查該逆水中屢次大敗皆因民船太多被我燒毀頓失所恃此次民船甚少純用大小戰船抵死抗拒又以兩岸及洲中營盤木簾互相保護局勢爲之一變欲攻江中之船必先破北岸之賊欲攻北岸之小池口必先破黃梅大河鋪孔壘驛之賊臣塔齊布見擬督軍速下黃梅與水師合攻九江郡城會同剿辦上諭內閣曾國藩塔齊布奏克復廣濟縣城並九江水師獲勝已於楊需奏到時降旨矣所有此次力戰捐軀之守備銜千總蘇勝把總鄭沐均著交部照守備例議卹六品軍功李金樑著交部照外委例議卹其水陸出力文武員弁兵勇著曾國藩等查明擇尤保奏○曾國藩塔齊布奏官兵克復廣濟後於十一月初一日在離黃梅十五里之大河鋪大獲勝仗殺賊三千餘人踏破賊營五座見

查黃梅縣孔塋驛及江岸之小池口悍賊尙多日內當有數次大戰臣等陸軍單薄惟當步步謹慎謀定後進不敢稍涉大意至固原提督臣桂明一軍臣國藩曾與督臣商定咨令桂明駐紮黃州以防賊由蘄州鈔襲後路是以該提督未能同赴下游報聞○癸未先是塔爾巴哈台參贊大臣英秀奏塔爾巴哈台原設綠營換防官兵一千二十九員名屯工七處耕種兵七百名差操兵三百名遵議變通兵制酌裁浮費請於該處屯兵內酌撤兵二百一十名差操兵內酌撤兵九十名滿洲官兵內酌撤兵二百名共酌撤滿漢各營官兵五百名每年可節省本處鹽菜銀七千餘兩又本處官廠牧放羊隻不下數萬除酌畱孳生外餘俱賞賣與蒙古官兵以時價合銀計可得價銀二萬四千兩卽在蒙古官兵每年俸餉銀內扣畱一萬二千兩作爲兩年歸還並可裁撤牧羊兵二百

名連前滿漢官兵共裁撤七百名通計每年可節省銀九千六百兩下軍機大臣會同戶部議至是奏滿營換防甲兵在途在防均有鹽糧借支等項既據該大臣等酌量裁撤其一切鹽糧借支等項均可覈減於經費實有節省至羊隻變價以抵經費一節覈其所奏不但體恤蒙古官兵兼可撙節經費其節省銀兩應令該大臣於估調經費時聲明扣除以昭覈實從之○予江西陣亡訓導劉芳槐等祭葬世職○甲申諭內閣吏部奏捐免試俸歷俸人員與京察保薦例義未符請旨定奪一摺此項捐免試俸歷俸人員既得題升截取已屬從優所有京察大典自不得與資深人員同登上考著各該部院堂官仍照舊章分別試俸歷俸年限辦理以符定制○諭載齡崇實奏遵查川省大吏收受陋規一摺各省規禮陋習例禁綦嚴原以懲貪墨而杜黃緣若上司不能廉潔奉公

又安望其正己率屬吏治之壞實由於此四川一省自總督以及監司大員率皆通同一氣收受苞苴大吏以捐款爲名復陋規之實司道以朘削所得爲結納之資試思府州縣以取之於民者應司道之求司道又以索之於府州縣者飽督撫之欲似此營私肥己不顧廉隅無怪屬員之藉逞刁風公務之日就廢弛甚至鑽謀賄屬朋比爲奸尙復成何事體卽將裕瑞以下與受各員從重按律懲辦亦屬咎所應得姑念其官非一任事非一年本日已將裕瑞併案革職其餘司道各員除另案查辦外已往之事姑予從寬嗣後該省一切陋規著永行禁革如有陽奉陰違仍蹈積習或另改名目暗復舊規者著該部從嚴定擬處分具奏以儆官邪並通諭各直省督撫督率監司大員務當簠簋自飭潔已愛民毋得婪私贖貨自取愆尤儻屢訓不悛仍復罔知自愛一經發覺必卽重

懲勿謂寬典可倖邀也懷之○諭載齡崇實奏查明督臣訪辦謀逆重案草率定讞各情一摺前據四川學政何紹基參奏總督裕瑞收受陋規並於鄭懷江等謀逆一案辦理錯誤特派載齡崇實前往四川查辦茲據奏稱鄭懷江等平日結會樹黨橫行鄉里復因糾眾爭奪解邦濠石獅欲行械鬪以致居民驚徙實屬目無法紀立置重辟已足蔽辜裕瑞輕信把總曾芝荃等偵探之詞雖經各屬查明聲覆仍固執已見輒以謀叛定案該督身膺疆寄於民命重情應如何詳審愼重乃有意傳會張大枉坐人罪非尋常錯誤可比且據載齡等查明該督平日有收受屬員陋規確據尤屬孤恩溺職撤任四川總督裕瑞著卽行革職所有會審承審各員四川候補同知沈英候補通判趙友泰署瀘州知州桂延署富順縣知縣徐繼鏞候補直隸州知州音德布琦齡並審轉未經結案

之前署按察使清安泰及勘詳之前任按察使升任廣西布政使胡興仁均著交部分別議處其緝拏此案之知縣曠一清守備李春錦千總蘇光贊前經裕瑞請予議敘著卽撤銷署南江縣知縣伊克精阿經裕瑞奏參革職茲既查明鄭懷江並無謀逆重情雖該員於地方棍徒未能嚴辦究屬疏於覺察伊克精阿著開復革職處分仍交部議處○諭載齡崇實奏參道員聲名狼藉等語四川建昌道俞文詔經該侍郎等訪查該員前在首府任內把持公事自府廳以下各官均奔走其門聲名狼藉劣迹昭彰若非立予罷斥不足以儆官邪俞文詔著卽行革職○諭載齡崇實奏請將逞刁藐法之把總懲辦等語四川把總曾芝荃謝洪恩於載齡等查辦鄭懷江案情飭傳到案畫供後輒復另遞親供蓋用鈐記經載齡等摘頂示懲曾芝荃袖出小刀自行劃傷臥地嚷鬧謝洪恩

亦直撲公案大肆咆哮似此兇橫藐法殊出情理之外曾芝荃謝
洪恩業經載齡等咨明革職著卽發往新疆充當苦差先於本地
方枷號兩箇月以示懲儆○諭軍機大臣等載齡崇實奏遵查四
川各案審明定擬各摺片該侍郎等前奏學政何紹基不收水禮
一節殊難憑信當經諭令再行確訪並查該員聲名如何未據該
侍郎等覆奏何紹基原參四川各員稱藩司楊培善諛嗣有人奏
俞文詔與該司聯爲一氣爲州縣代謀升調拜認師生是楊培之
不能勝任藩司已可概見有無別項貪污劣迹並俞文詔索取行
戶陋規得受廠商賄賂各款均著再行確查據實參奏毋得稍有
不實不盡將此由五百里諭令知之○諭勝保奏連日攻賊情形
並統籌全局等語覽奏殊多支飾該大臣擁兵高唐城下數月以
來未建寸功據奏攻其西門南門冀可出其不意是必偵知該兩

門賊勢鬆懈可以一鼓而進方爲確有把握乃不過誘殺廿餘人仍屬不能得手所開地道與安設地雷亦未見迅速辦妥復以賊濠頗深又待籌加鑲板賊情詭詐其堅拒之計既百出不窮而該大臣籌攻之具亦已多方均屢試而不效可見兵法所謂知己知彼者該大臣直未講求節次諭令速圖進取毋再遷延豈藐爾孤城臨以鉅萬重兵竟無制勝之策該大臣自知慚憤不思設法剋期攻克以贖愆尤轉慮及於東南兵力之不能兼顧以楚軍南下賊勢必致旁竄防兵偏歲生懈爲虞所言何嘗不中肯綮獨不知該大臣麾下將士裹糧坐甲瞬偏殘年不免生懈耶見在楚境蕩平曾國藩等埽除九江一帶賊匪後即可直擣安慶南北各要隘早經諭知各路統兵大員及各該地方大吏嚴兵扼守勝保所稱南賊於年內果無蠢動則北路可望肅清是直以南賊能否北竄

爲高唐能否攻復之符驗舍己責人尤爲鄙佞不知東境之賊不
過連鎮竄餘之匪爲數無多一經剿洗則南賊聞風膽落更不敢
復萌北窺之心卽連鎮賊巢亦失其犄角之勢勝保束手無策遁
辭飾非清夜自思能無羞愧且聞該逆並未關閉城門任意出入
兵勇無人過問每於數十里外搶掠村莊劫取糧食儻任其陸續
宵遁茫無聞知將來以收復空城入告糜餉勞師俾逆賊蔓延他
處勝保尙有何顏見朕耶著卽懍遵前旨速籌攻復毋得於數日
後具奏軍情一次以空言爲塞責也將此由六百里加緊諭知勝
保並諭德勒克色楞善祿崇恩知之○乙酉 上復詣 大高殿
祈雪○展 西陵八旗兵丁應扣借支銀○丙戌曾國藩塔齊布
奏賊匪自廣濟敗竄後逆首秦曰綱等分率各股羈聚黃梅縣城
踞險死守大河鋪立營五座臣塔齊布與羅澤南探明賊壘於十

一月初一日進攻雙城驛賊匪二萬餘人乘我軍初至分三路來撲臣塔齊布與羅澤南周鳳山等亦分路迎擊右路之賊先潰周鳳山等奮登山岡衝殺岡下之賊亦潰惟中路賊排列溪岸死守不退鏖戰良久我兵躍溪而過刺死悍賊數人該逆抵敵不住我兵分路追殺直偏大河鋪賊壘賊從營內衝出敗賊復行回撲羅澤南等揮軍進戰將賊營五座立時踏破共斃賊三十餘人生擒九十四名奪獲旗幟軍械馬匹無算該逆所聚之糧皆爲我有初二日進兵抵黃梅城初四日周鳳山等攻西門羅澤南等攻北門令彭三元等列陣橋西以待臣塔齊布與羅澤南繞北面溝港取道而入賊眾萬餘排列營柵槍礮火箭齊施臣塔齊布督率兵勇仰擊更番疊進鏖戰良久李續賓先偏木柵立斬執旗賊目數名羅澤南蔣益澧帶勇隨進彭三元等亦從西面越過二橋各勇從

柵門躍入縱火焚燒賊勢大敗辰勇湖北勇從東南進道州各勇從西南進適魁王楊昌泗亦率兵勇由大河鋪至四面圍剿賊由營壘潰出經我兵刺斃二千餘人乘勢直逼北門城上賊匪倉卒奔潰各勇追殺千餘人入城後殺斃數百人當將黃梅縣城收復臣塔齊布與羅澤南等入城安撫難民餘賊下竄宿松太湖其大股仍屯踞孔塋驛小池口臣曾國藩已飛咨楊霨桂明卽日整隊東來於梅濟交界處擇要駐紮以堵西竄之路臣塔齊布卽日進擣小池口與水師會合先剿北岸次清江面然後渡江以圖攻克九江此次千總周友勝爭先陷陣殺賊甚多請以守備補用賞換花翎守備余星元滕國獻均請免補守備以都司補用擬保守備王映軫被戕最慘懇恩照守備例賜卹又奏前月江西戰船在姑塘被賊撲營小有挫失我軍水師防範愈嚴十一月初一日賊船

數十前來撲營李孟羣督彭玉麟等各營奮力圍攻羶斃賊匪無數鏖戰三時卒未能大挫兇鋒皆因兩岸賊營太多水陸依護抗拒甚力我師與陸軍隔絕孤懸大江介處賊營之中晝夜戒嚴該逆每夜以火毬火箭近岸拋擲連日雨雪交加水師船泊中港則爲風波所撼泊岸邊則爲陸賊所撲故日來水軍勞苦有倍過於田鎮以上者臣等查近日剿辦情形賊匪搶掠焚毀日甚百姓恨之切骨臣軍所到處民皆願爲偵探嚮導兼之今年兩湖三江年穀豐收萬民樂業翹首望治各省餉需解到軍士飽騰臣等全軍二萬人悉皆和睦幾如家人骨肉之聯爲一體軍事略爲可恃惟江西水師自姑塘失利退紮吳城該逆水陸來撲江西省戰船四十餘號盡被搶奪旗幟礮械皆爲所有該逆見在安徽仿照我軍船式新造戰船三十餘號意圖西上賊艘益增其氛益熾若使屯踞

湖口梗塞於鞋山姑塘之間內窺江西外拒我軍地形險隘勢難
近下我軍與江西咫尺隔絕不能相通探聞九江之賊出撲總兵
居隆阿營盤湖口之賊分竄饒州臣等陸軍單薄南北不能兼顧
而且轉戰千里亦恐疲於奔命將領中求其獨當一面者殊難其
人水師營中楊載福以積勞致疾何越珽以受傷出營陸路諸將
皆勇多謀少設有敗挫無能撐拄臣等隱以爲慮目今之計惟有
力攻小池口孔壘驛之賊紮營江岸使水師得所依護待督臣楊
需抵黃梅後北路足資堵禦然後臣塔齊布與羅澤南全師渡江
以圖攻克潯郡 上諭軍機大臣等我軍克復廣濟後於初四日
收復黃梅是陸路一軍頗爲得手惟大股逆匪尙聚於孔壘驛小
池口等處我軍水陸兩路聲勢未免隔絕況江西水師未能得力
兩岸賊營甚多水陸抗拒曾國藩水上一軍介處賊營之中情形

頗覺危險據奏所慮各端甚爲周密此時自應於屢勝之後倍加
慎重萬勿稍涉孟浪致誤事機儻將孔壘驛等處賊匪剿盡紮營
江岸使水師與陸路互相聯絡然後相機進剿庶不至有顧此失
彼之虞楊滸見駐黃梅廣濟之間卽應督飭魁玉楊昌泗等迅速
進剿北岸一帶卽責成該督實力攻剿俾塔齊布羅澤南等可以
全師渡江爲圖攻九江之計若專恃該提督一人奔馳南北兩岸
徒勞兵力更恐銳氣銷磨於攻剿轉無裨益江西帶兵之臬司惲
光宸前任總兵趙如勝等已有旨由曾國藩調度儻該員等不知
奮勇剿賊卽當嚴參懲辦逆匪搶奪江省戰船四十餘號又在安
徽造船七十餘號意在拌力死拒該侍郎等務當督飭水陸各軍
謀定後戰設法迅圖克復九江郡城毋令逆賊盤踞日久牽掣我
軍將此由六百里加緊各諭令知之○予江南陣亡參領永陞等

祭葬世職○丁亥諭軍機大臣等葉名琛柏貴奏省城北路剿匪連次獲勝一摺朕詳加披閱近省一帶辦理似有頭緒該督等摺內所敘均係八月內情形見在閱時又將三月自必續有勝仗近省各匪巢諒可悉數埽除該省滿漢官兵同心協力紳士壯勇均能聯絡勇往正當乘此軍威甚盛之時一鼓作氣肅清巢穴根本既固然後妥速布置將東西北三處匪徒漸次剿辦著穆特恩托恩東額葉名琛柏貴督飭滿漢各營將弁兵勇激勵在城官紳士庶迅速將附城匪巢及所轄各屬匪巢全行撲滅毋畱餘孽以淨根株至東路潮州各屬據本日奏報剿辦尙爲得手但以本地之兵禦本地之賊誠恐轉戰力疲若省城能一律敕定則移得勝之師分路四出東會閩兵救應潮州西會廣西官兵攻復肇慶北會江西湖南兵勇疏通南韶大路皆可措置裕如見在王懿德所派

漳泉兵勇二千名已交總兵慶寅管帶由海道前進駱秉章所派
辰沅兵一千名已交署遊擊龍金源管帶於十月初四日由長沙
啟程陳啟邁所派南康練勇三千五百名已由始興進剿勞崇光
所派之右江道張敬修計日亦可出境各路援兵四集必須本省
官兵大振聲威爲之倡率方能合力兜剿廣東民氣素強兵力亦
足見雖各屬匪徒蜂起一經辦有端倪諒不難次第剿除也將此
由六百里諭令知之○予河南陣亡副將春明祭葬世職建祠廣
東傷亡知縣倪森祭葬世職○戊子諭內閣惠親王等奏請飭山
西採辦鐵斤解交京局以資鼓鑄一摺見在鐵錢局四廠開鑄鼓
鑄歲需生鐵一千二百萬斤僅就附京地方採買不敷應用著山
西巡撫卽飭藩司迅派廉能可靠之員如式採辦務於咸豐五年
二月以前先將一半生鐵六百萬斤解交京局毋得稍有短絀致

誤要需所需工本運費卽在該省藩庫錢款項下作正動用再由鐵錢局卯錢內照數劃出按月解交戶部以抵該省應解部庫之款其每年例解鐵斤既經停解仍將節省價腳銀兩解交部庫以清款目○諭軍機大臣等蔣霽遠趙萬春奏安南匪徒滋事並督臣在營病故等摺片遵義大營調集滇黔兩省官兵爲數不少正當攻剿喫緊之際而督師大員遽爾出缺軍情不無惶惑趙萬春以本省提督統轄全軍責無旁貸務宜一面鎮定軍心一面速籌撲滅若稍事耽延致令負隅日久雖遵義興義相距尙遙未必遽至蔓延句結而南北兩路同時蠢動黔省餉絀兵單勢將不可收拾該撫見駐紮札佐距省城甚近雖云居中調度仍不可一味株守以見在賊勢而論遵義一路兵力甚厚且有川省之兵前後夾擊興義匪徒亦係烏合初起金剛保所帶兵已有一千五百名加

以前調滇兵七百名亦儘敷剿辦該撫務須統籌全省大局以先
剿遵義爲要興義一帶卽責成金剛保福連迅速妥辦毋任遷延
將此由六百里諭令知之○雲貴總督羅繞典卒予祭葬卹蔭諡
文僖賞其孫清提舉人○以恆春爲雲貴總督兼署雲南巡撫調
王慶雲爲山西巡撫吳振棫爲陝西巡撫未到任前命工部右侍
郎載齡署理以舒興阿爲雲南巡撫

由塔爾巴哈台參贊大臣遷

○以貴州安

南縣城被賊竄陷革知府張鏌等職仍畱任剿賊○綏遠城將軍

善祿卒予祭葬卹蔭諡勤壯○予貴州安南殉節知縣朱右賢祭

葬世職建祠○己丑袁甲三奏蘇添幅在寺兒集戰敗後餘眾逃

匿官兵分赴新集王家岡丁家花園顏家集各處追捕先後擊獲
首夥李秉倉等八十餘名陸希湜張維翰等會商以該匪並無大
股無庸眾兵會集遂各歸各境沿途復擊獲馬老虎石洪等四十

餘名復探得毫境泥臺店蔡家莊等處尚有伏匪分兵前往掩獲多名內有大捻首丁士彥張巨善劉根等三犯卽時正法又捻首張傳傳聞前在寺兒集被破轟斃又王大柱卽王秉善見充勇目暗中通匪業已鎖押責令計拏蘇添幅並以誘餌張落刑如能得手不難同時翦除臣派出文武各員以南路逆匪被剿窮蹙必須嚴防紛竄已札令陸續撤隊暫回臨淮大營聽候差遣該文武等著有微勞懇恩給予獎敘 上諭內閣此次剿辦回竄亳州捻匪以少擊眾及早殲除在事員弁均屬著有微勞卽補訓將朱連泰著賞加總兵銜都司戴世熙著賞換花翎知府張家駒著賞戴花翎○諭袁甲三等奏進剿廬舒以南逆匪一摺並片奏續獲勝仗等語賊匪竄擾桐城並於大小兩關踞險抗拒經袁甲三等派令參將劉玉豹等帶兵進剿該逆紛紛倒退回扼大關賊紆青等分

帶兵勇三路進取賊眾擾亂我兵長驅入關窮追至白沙嶺計自
午至酉連奪兩關餘匪竄奔桐城劉玉豹臧紆青等進薄東南兩
門躍過濠溝直抵城下廬江賊匪會合安慶賊匪來桐救援臧紆
青等復合力鏖戰餘眾竄入街內其竄出北街者復被郭錦及文
生鹿慶商等衝殺臧紆青自率大隊轉至賊後兜圍殲戮眾賊殆
盡奪獲旗幟器械無算桐城爲驛站通衢大小關爲桐城要隘見
已奪險薄城大兵所至沿途居民無不爭先迎叩鼓舞歡欣著袁
甲三等卽飭帶兵文武乘此軍威大振之時趕緊將桐城縣城克
復以孤廬城賊勢所有出力員弁兵勇並著袁甲三等先行擇尤
保奏候朕施恩○諭葉名琛柏貴奏勦辦省城北路股匪疊獲大
勝攻毀賊巢一招廣東省城北路匪徒經疊次勦洗後仍於佛嶺
市蕭岡龍潭觀等處踞險抗拒葉名琛等飭令參將衛佐邦濟山

等各帶兵勇分路進剿千總王大榮帶潮勇首先攻入龍潭觀縱火焚燒賊眾驚潰蕭岡賊亦慌亂衛佐邦乘勢揮兵闖入賊巢該匪潰奔當將龍潭觀蕭岡兩巢蓬廠六百餘座全行燒毀我兵分路前進鈔襲佛嶺市後道員沈棟輝揮兵乘勝圍攻火箭火毬打入賊巢蓬廠延燒我兵奮力鈔擊該匪望風披靡紛紛奔竄賊營二十餘座全行燒毀統計旬日之間連破賊巢共斃賊二萬有餘斬首三千餘級生擒五百六十九名所有疊次尤爲出力之將備員弁著該督等覈實保奏近省北路賊壘雖已漸次剿除所有逃往石門石井各鄉餘匪著該督等務卽乘此聲威全行剿滅以靖地方○諭奕山圖伽布奏籌議牲畜變價抵給餉項一摺所有察哈爾額魯特兩營官兵應領餉銀著照該將軍等所請准其將伊犁見存牲畜估變銀五萬二千六百七十八兩零以抵該官兵餉

需分作三年抵扣完款以示體恤○諭軍機大臣等此次臧紆青劉玉豹等帶兵進剿廬舒以南奪回大小兩關直偪桐城賊已失其所恃辦理甚爲得手惟該員等所帶兵勇不及二千餘人而桐城南距安慶西距潛山東距廬江相去皆不甚遠我軍深入重地三面受敵即使克復縣城亦恐兵力過單勢難守禦臨淮等處卽無兵可撥會國藩塔齊布水陸兩軍見在圍攻九江該處賊匪尚多亦恐不能剋期抵皖臧紆青等攻剿桐城固不可遲延觀望亦不可銳進貪功致有挫失舒城距桐城僅一百二十里秦定三在彼督兵攻剿聲勢較易聯絡著和春等卽飭該提督迅速籌撥兵勇駐紮大小關以爲臧紆青等後路聲援該處爲舒城安慶往來之路今爲我軍所奪不特舒城之賊勢已孤卽廬州之賊亦必氣奪和春等正當乘此機會一面督飭秦定三迅攻舒城一面嚴飭

各營兵勇進剿廬州如能克復郡城即可統兵南下與臧紆青等合力進剿儻再事遷延致大軍爲其牽掣和春等貽誤之咎斷難寬宥逆匪在林母圩偷結賊營業經署臬司恩錫廬鳳道張光第督率兵勇攻毀賊壘惟和州含山尚未克復浦口一帶賊船往來麇集著飭該員等隨時偵探相機進剿勿得株守一隅其上游敗竄之匪並著實力堵禦毋稍疏懈將此由六百里加緊諭令知之

○庚寅晉封 懿貴人那拉氏爲 懿嬪○祁寯藻因病乞休命以大學士致仕命賈楨爲大學士調翁心存爲吏部尚書以周祖培爲兵部尚書許乃普爲左都御史轉張祥河爲吏部左侍郎調卓樞爲吏部右侍郎

由兵部調○辛卯諭內閣軍興以來需餉浩繁籌撥帑金已不下數千萬兩各直省辦理捐輸頗爲踴躍捐貲各生疊經降旨優加獎勵陝西省素稱富庶且民風淳樸好義急公前

經王慶雲奏請捐借並行聞此時爲數尙屬無多固由民力或有未齊亦該地方官未能設法勸諭所致見在楚中水陸大軍建瓴東下由潯皖直擣金陵其餘各路軍營亦頻經奏捷方期迅掃妖氛與吾民共登衽席軍餉要需尤應寬爲籌備所有陝西省捐借事宜仍著責成該撫督率藩司飭令該地方官會同特派勸捐之在籍紳士等妥爲勸導俾身家殷實者均得遂其輸將之愜一俟集有成數卽由該撫迅速奏報俟朕優加獎敘儻任令屬吏等抑勒侵漁藉滋蒙混以致該紳民等遷延觀望有誤要需惟該撫是問○壬辰僧格林沁等奏連鎮賊匪受創數十次時思潰竄連日窺撲瑞麟都興阿等營牆均經官兵奮勇擊退先後斃賊無數該逆窮蹙愈甚防守愈堅臣等每欲進攻該逆無分晝夜在壘瞭望並埋伏多名擊槍以待不容我兵進撲無隙可乘陸續投出民人

六十餘名據稱情願殺賊報效臣逐一查看俱係誠心向順見在賊糧僅敷一月該逆斷不肯束手待斃勢必舍命奔撲臣等已諄飭各營加意嚴防乘機進攻大約年內可望蒞事上諭軍機大臣等連鎮逆匪屢次伺隙撲擾營盤該大臣等僅能待其出撲後擊退回巢並不思實力進攻此次所陳擊敗各情亦屬仍前敷衍斃賊多寡亦無確數據云年內可望蒞事即使實有此把握又豈得謂之迅速耶所奏賊多設伏以待不容我兵進前以數萬官軍勦此窮寇若竟任其死守不圖進取日久相持兵精支絀思之憤悶所有投誠賊匪恐不可恃尤應畱心駕馭勿墮奸計當此天氣沍寒士卒疲乏該大臣等惟當激勵各營文武趕緊籌攻斷不准再延時日致生他變節次批示及所降諭旨備極詳明別無可諭矣將此由六百里加緊諭知僧格林沁並諭西凌阿知之○癸巳

上再詣 大高殿祈雪○諭軍機大臣等本日據陳啟邁奏安慶逆匪分竄九江湖口擾及吳城一摺又據和春福濟奏楚北敗匪由太湖竄至英山縣城失守等語湖北逆匪經曾國藩等大軍痛剿之後餘匪竄入皖境本屬意中之事惟和春等攻剿廬州兵力不敷分撥袁甲三駐紮臨淮亦恐兵力較單勢難兼顧此時安徽北路情形喫緊楊需見駐黃梅廣濟之間該處與皖境毗連該督應卽相機移師前進遏賊北竄之路著卽悉心籌畫迅速辦理毋得以楚境肅清稍分畛域至安慶逆匪分竄九江擾及吳城江西兵勇業經失利旣不能與曾國藩等會合剿擊且恐該逆深入江西牽掣我師則曾國藩等水陸諸軍亦難直抵安慶孔壘驛小池口等處賊匪是否業已殲除塔齊布等能否渡江攻剿潯郡此時該侍郎等所帶兵勇雖不能分撥赴吳城協剿亦當設法兼顧

毋令分竄總之上游攻剿得手則江西安徽皆匪蹤所必至楊需等務當統籌全局使水陸各軍聯爲一氣將濱江兩岸賊氛以次掃除實深殷盼將此由六百里加緊各諭令知之○諭前因曾國藩等水陸各軍節次於蘄黃田鎮等處大挫賊鋒朕卽慮楚軍得勝之後該逆必紛紛旁竄諭令和春等趕緊克復各城毋使大兵爲賊牽掣致逆匪被偏有北竄之慮乃本日和春等所奏廬舒含山各營攻剿情形均不過小勝而博勒霍布等所帶兵勇雖入太湖縣城卒被敗匪攻陷英山亦復失守固由該提督等兵力未能兼顧亦因廬州等處未卽克復致竄皖之賊分支突入剿辦又多棘手見在含山官渡烏衣鎮一帶雖有李鴻章恩錫張光第等在彼駐紮攻剿惟皖省土匪本多若再與逆賊勾結勢更蔓延見已諭楊需就近由楚分兵前往堵剿而賊情飄忽該提督等仍當嚴

飭秦定三迅復舒城以便移兵往剿如果事機緊急卽著秦定三酌派弁兵馳往應援其六安一帶卽飭知州茅念劬糾集鄉團以資堵禦其前調河南防兵一千名幫同玉崑防守正陽一節已據英桂奏稱飭牛鑑帶兵前往著咨會袁甲三迅速迎提扼守要隘和春等師久無功儻復不能遏賊北竄朕必重治其罪將此由六百里加緊諭令知之○諭此次官兵連攻九江不能得手多有傷亡以致賊匪分股擾及吳城焚擄戰船八十餘隻逆燄猖狂殊深憤悶吳城距省甚近設被賊久踞窺伺省城關繫非細本日已將江西緊急情形諭知曾國藩等令其斟酌辦理但曾國藩等攻剿江面賊船正在喫緊能否分兵助剿殊難懸定塔齊布等陸路一軍須攻克孔壘驛小池口之後始能渡江進取潯城此時陳啟邁務當嚴飭帶兵員弁趕緊將吳城賊匪悉數殄除以固省城藩籬

至九江兵力疲弱仍著責成居隆阿挑選精壯認真訓練以資攻
剿勿專待楚軍援助致失機宜將此由六百里加緊諭令知之○
河南巡撫英桂奏邱聯恩督剿光屬捻匪擒獲巨捻丁心田歸德
一帶擒匪自張維翰接辦後頗爲得手惟輝縣刁民糾眾數千任
意抗拒開封衛輝二屬人心亦覺浮動見當漕糧緊要擬暫駐省
城就近調度俟情形稍定再行前赴歸陳擇要督防得旨一切情
形均悉張維翰雖已被參然督防尙屬得力著斟酌畱防亦可至
輝縣不至釀成巨案方好○予江南陣亡遊擊海明等祭葬世職
○撥河南司庫銀十五萬兩備安徽軍需○甲午諭內閣京師入
冬以來未霑雪澤疊經降旨設壇祈禱並親詣 大高殿行禮迄
今已逾旬日尙未渥霑祥霽朕宵旰焦勞時勤修省因思清理庶
獄冀可感召 天和所有刑部及順天府見審人犯或因未經定

案久羈囹圄疾病顛連情殊可憫著該衙門督飭承審各員將已結未結各案逐一清釐其有情節可矜甚至含冤待白者務卽悉心研鞫立予平反至問徒以下輕罪人犯以及干連待案候質人證訊明後卽行發落省釋毋任稽遲積壓拖累無辜此外尋常案件並著速行完結以期翕應祥和用副朕欽恤惟刑之至意○是月展緩兩淮富安等十四場被水竈地新舊額賦甘肅河州等八州縣舊欠額賦及涇州等九州縣新舊銀糧草束

東華續錄

咸豐四十三

臣王先謙敬編

臣陶濬宣恭校

十二月乙未朔諭內閣扎拉芬泰等奏喀爾喀扎薩克圖汗賽音諾顏二部落汗王貝勒貝子公扎薩克台吉等及所屬部落扎薩克郡王桑噶錫哩等見因逆匪尙未剿除淨盡情願捐馬二千一百餘匹以備軍營調用等因呈請代奏請旨一摺喀爾喀扎薩克圖汗賽音諾顏二部落汗王貝勒貝子公扎薩克台吉等情願捐馬二千一百餘匹以備軍營需用洵屬衷悃出於至誠實堪嘉獎惟該汗王等悉賴此項牲畜度日且各處逆匪業經官兵疊次獲勝殲斃多名殘喘么膺自可指日翦除著扎拉芬泰等將此轉諭該部落汗王等其所捐馬匹均著毋庸賞收以示朕嘉獎蒙古體

恤世僕之至意○丙申諭內閣會國藩等奏請將帶勇滋事之員革職治罪等語同知銜卽選府經歷縣丞李光榮管帶川勇協剿於該勇等強坐民船不給船價並將船戶砍傷有心庇護追師至漢口經曾國藩拏獲滋事之勇派員審訊李光榮膽敢率眾持械奪犯復縱容該勇攔江索詐駕船搶賊並於羅澤南移營搬餉之時突往搶掠錢文傷斃長夫多名種種不法實出情理之外李光榮著卽革職拏問交楊需嚴行審訊按律治罪毋稍寬縱○曾國藩塔齊布奏自我師北渡後該逆三次大敗皆僞王秦曰綱僞檢點陳玉城兩股居多其僞丞相羅大綱率安慶新到之賊尙盤踞孔壘驛小池口一帶與潯郡之賊對江而營使逆船得依岸久踞老我水師本月初七日羅澤南督同李續賓等共四千人拔營前進二十里至濯港地方突遇大股賊二萬餘人由孔壘馳至營

於濯港小市之北羅澤南飭令諸軍堅伏不動相持五六刻該逆分一支從田壠繞山撲我東岡之師一支從湖尾撲我西岡之師而由中路進者獨多直偪岡前我東岡之勇一鼓而下斃執黃旗賊數名西岡諸勇旋亦衝出兩路賊潰分投追殺中路悍賊鏖戰良久前者已死後者不退東西官軍進至市前漸鈔中路之尾賊黨始三路同潰追入濯港市內斃賊四百餘人偪溺市西池中者八九百人其大股循市南奔逃我兵沿途追殺又斃賊百餘人其小股由湖汊之西逃者湘勇分數隊往追寶勇繼之追至數里有伏賊從樹林中突出勢甚兇猛諸勇退卻陣亡三名李續賓等率勇由湖中橫隄鈔過湖邊之賊又潰追殺百餘人共斃賊約千四百名生擒八十五名十一日臣塔齊布進駐白湖渡十二日我軍全師進攻以北路單隄太窄不能布陣乃至烏魚金壩訪有小

路可繞賊巢之西南

臣

塔齊布帶各標從北路隄上入羅澤南帶

勇從西南烏魚金壩分路而入殺斃前隊賊匪數名追至孔壘驛

賊見我兵三面環至施放槍礮子如雨下其悍者出牆迎戰勢甚

兇猛我兵一擁而前悍賊亦入牆抵禦木石紛擲槍礮愈急我軍

跟蹤乘之突入土城或三四人以肩爲梯互乘而入其尤勇者卓

矛於地一縱躍入入土城者已多而城外仍合成長圍賊黨無處

可逃偪入東面寒流泥淖之中溺死者以千餘計奔入市中被諸

勇追殺者約二千人因縱火大燒街市會西北風作孔壘市中數

百家須臾灰燼諸勇環守賊眾鮮得脫者生擒長髮賊七十九名

內有僞副丞相余幅勝一名總制陳姓雷姓二名師帥軍帥十餘

名立予正法

臣

國藩以孔壘旣破小池口之賊必不能支卽飛飭

水師進擊李孟羣彭玉麟等於十四日卯刻進攻而小池口陸賊

已於十三夜全數奔竄矣餘賊爭駕小划南渡我軍急起直追賊划駛近南岸陸賊開礮護之都司秦國祿等衝煙進擊賊眾紛紛墮水擊沈賊划七八隻焚毀大木簰一座復延燒洲上賊營一座遂縱火徧燒小池口陸路賊營煙燄蔽空彭玉麟乘勝追至新港復斃黃衣賊目一名賊遂披靡奔竄臣國藩卽於是夜泊紮九江城外十五日臣塔齊布亦至小池口水陸會合該逆於西門出數百人向江心施放槍礮李孟羣飭勇上岸追殺各戰船復轟礮助之賊始奔潰廣勇連擲火毬燒毀龍開河木城一座彭玉麟等遂率大隊直下湖口至扁擔峽洲邊焚毀賊船甚多各營遂分泊口內並口外之梅家洲八里江等處緊扼要隘連日據生擒並投誠之賊供稱秦曰綱自黃梅大敗竄往舒城羅大綱自孔壘大敗卽日竄至小池口率其死黨千餘渡江連夜奔至湖口僞丞相林姓

見踞九江與湖口相犄角將爲死守抗拒之計臣塔齊布於郡城

上游渡江將繞出南路羅澤南於郡城下游渡江將圍攻東路水

師扼截湖口務使賊所搶奪江西船礮全數兜剿不許竄出大江

免貽後日無窮之累三路痛殲可期上復潯城下清湖口以制劇

賊之命此次水陸兵勇廓清摧陷轉戰無前補用守備朱南桂冒

險衝陣連撲賊營應請免補守備以都司補用都司童添雲每戰

摧鋒不避矢石應請以參將升用其餘出力員弁兵勇請由臣等

覈明保獎仰候恩施其陣亡兵勇查明照例辦理又奏臣等一軍

陸路實尙單薄北渡則不能兼顧南岸南渡則不能兼顧北岸屢

欲添調兵勇然非實在得力之軍則無益而反有損是以倍加審

慎見在由小池口南渡上則攻圍潯城下則剿辦湖口已屬不敷

調遣而北岸宿望潛太等縣尤須有得力之員協剿方無顧此失

彼之虞查湖北按察使胡林翼識略冠時所帶之勇曾經訓練臣國藩前與督臣楊需往返咨商札飭該臬司帶勇二千駐防田家鎮外助大軍之聲援內固鄂省之藩籬中則接剿匪黨以靖輿治斬黃之餘孽酌畱礮船以巡江楚接壤之河面該臬司接札後卽馳至廣濟之武穴籌議設防事宜武穴去潯僅九十里臣等見因攻圍九江陸軍太單就近飛調胡林翼來潯助剿一俟克復郡城攻破湖口再行飭回楚境駐防田鎮至北路黃梅太湖等縣鄂皖毗連北通舒廬東接宿望必須有重兵分布查鄂省有副將王國才都司畢金科樸實勇敢馭軍有法臣國藩咨商督臣楊需督臣卽酌撥勁旅札飭該副將都司交臣等調遣擬俟鄂省肅清卽由塔齊布督帶出境東征至皖省各員查有池甯太廣道何桂珍見帶勇千餘人督同已革知縣李沛蒼在六安等處防剿四品頂

帶賊紆青亦帶勇至霍山疊准袁甲三函開該道等齊至英山俟臣等一軍入皖即可會合進剿今臣等攻破黃梅已逾半月而何桂珍尙無來會之信見值剿辦喫緊急須併爲一軍乃能呼吸靈通首尾相應仰懇皇上天恩飭諭鄂省之王國才等皖省之何桂珍等概入此軍歸臣等調遣其所帶之兵勇由臣等簡汰分別辦理庶兵力稍厚於大局更有裨益上諭此次水陸官軍續獲大捷肅清潯郡江面見在大軍扼守湖口內外要隘九江逆匪首尾不能相顧可期卽日埽除曾國藩塔齊布運籌決勝勦力同心麾下將士率皆轉戰無前爭先用命皆由曾國藩等調度有方覽奏之餘實深嘉慰曾國藩著賞穿黃馬褂並發去狐骹黃馬褂一件白玉四喜搬指一箇白玉巴圖魯翎管一枝玉靶小刀一柄火鐮一把交塔齊布祇領以示優獎補用守備朱南桂冒險衝陣連

撲賊營著免補守備以都司補用升用遊擊童添雲每戰摧鋒不
避矢石著以參將升用其餘出力員弁兵勇卽著查明具奏候朕
施恩○諭軍機大臣等會國藩塔齊布奏陸路兵單南北不能兼
顧朕已早慮及此是以疊次降旨命楊需出省督勦北岸命陳啟
邁派兵出江夾擊並桂明等不能得力准會國藩單銜參奏及憚
光宸趙如勝之兵均歸會國藩等調遣之諭原以皖鄂江西三省
帶兵之員多有距本管督撫較遠而離會國藩大軍轉近者非事
權歸一則呼應不靈隔絕推諉於軍情大有關係所有湖北臬司
胡林翼所帶之勇副將王國才都司畢金科所帶之兵均著楊需
飭令星夜馳赴會國藩等軍營悉聽該侍郎等調遣其和春等派
出之已革道員何桂珍袁甲三派出之四品銜臧紆青等見在桐
城一帶諒因英山失陷是以未能南出潛太著會國藩卽行飛飭

催提併歸一軍如有將弁桀驁兵勇孱弱者卽行認真簡汰不得稍存避嫌之見致一軍中強弱不齊轉費周折皖鄂毗連各屬昨已諭楊需移師前進迅速防剿著卽懷遵辦理由宿望潛太一路次第進攻並防逆賊由瑞昌擾竄興國轉出會國藩等大軍之後不得專駐楚境致成株守楊需帶兵出省後湖北省不免空虛著俟克復九江後卽飭胡林翼帶兵回至楚境以資防堵江西逆匪昨據陳啟邁奏已於初五日竄聚吳城尙在此楚軍獲勝之前明係我兵攻剿緊急該逆聞風內竄仍堅踞潯郡牽掣大兵陳啟邁所請酌調楚師之處能否分撥著會國藩等妥籌兼顧江西兵力輒弱至此年餘以來所謂訓練者安在憚光宸係督辦大員趙如勝亦會膺專閫若再不整頓全軍迅將吳城逆匪擊退或致省城復有震動朕不能爲陳啟邁宥尤不能爲憚光宸等曲從寬典也

會國藩另片奏請飭江西製造夾布口袋一萬條每袋計可盛土百斤等語卽著陳啟邁如數製備迅解會國藩等軍營備用毋稍遲延將此由六百里加緊各諭令知之○戊戌諭內閣前因已革漕運總督楊殿邦有應賠提用銀兩曾經降旨交福濟飭令該革員如數賠足茲據該撫奏查明該革員實用銀數見未據經手各員報銷請飭河臣就近調集質算等語所有楊殿邦提用未銷鹽課銀十二萬餘兩卽著楊以增調齊卷宗及領放經費之已革揚州府知府張廷瑞前淮北監掣同知李安中海州通判許敦詩與楊殿邦將用存確數逐一質算責令該革員等趕緊賠繳毋任藉詞延宕○諭前因安徽六安英霍等州縣紳民捐貲出力殺賊克城當經降旨將該州縣咸豐三四五等三年地丁錢糧加恩概予豁免茲據福濟奏稱六安英霍之復藉資民衛之力居多請將漕

米衛糧一體豁免加恩著照所請所有六安州英山霍山兩縣應徵咸豐三四五等三年漕糧南米及屯折津貼錢糧概予豁免該撫卽刊刻謄黃徧行曉諭務使實惠均霑毋任吏胥舞弊用副朕嘉獎忠義有加無已之至意○諭和春福濟奏克復英山縣城一摺前據和春等奏楚北敗匪由太湖竄擾英山當經諭令督飭文武趕緊剿辦茲據奏稱十一月初十日英山縣知縣蘇秀槐招集團練並商撥湖北羅田壯勇進剿殺斃守門逆匪奪入縣城殲賊無算逃奔之賊並經練勇截殺多名該撫甫經到任前因本城兵勇空虛被賊突竄旋即克復城池尙知奮勉應得處分著加恩免議湖北羅田縣知縣彭仲芳派撥壯勇逾境援剿洵屬得力著賞加知州銜以示鼓勵○諭軍機大臣等吉爾杭阿奏疊次攻剿逆匪轟塌城垣一摺上海逆匪屢次冒死衝突復於陳家木橋一帶

興築礮臺挖掘地道十月十五日以後屢次出撲雖經我兵殲斃多名並於南門迤西挖掘地道惟僅能轟塌城垣仍未卽時攻克且兵勇傷亡亦復不少該撫督兵剿賊日久無功覽奏各情殊深焦急至佛蘭西國提督噉呢喃犁毀賊築礮隄並開礮擊賊與逆匪釁隙已成原可乘機攻剿惟在因勢利導督飭兵勇剋日進攻限於年內將上海縣城克復若曠日持久使蕞爾孤城爲賊久踞該撫貽誤之罪斷難倖邀寬宥也將此由六百里加緊諭令知之○諭吳振械奏黔匪逼近滇省見籌防剿一摺貴州興義府匪徒滋擾攻撲興義郡城安南普安縣城相繼失守本日據蔣爵遠奏安南普安縣城業經收復惟餘匪尙多猶慮竄突且興義匪黨尙未擊退該處距滇甚近亟宜嚴加堵禦該撫見調曲靖尋甯兩營並昭通等兵派委參將鄂勒霍巴管帶前赴平彝會同署曲江府

知府賈洪詔妥籌辦理務當嚴飭該員等擇要扼守毋令黔匪竄越滇境吳振械見署總督兩省軍務均宜統籌妥辦尤當持以鎮靜不可稍涉張皇再前因黔省軍餉緊急當經蔣爵遠奏准撥雲南藩鹽庫銀二十萬兩茲據蔣爵遠奏稱滇省止能撥銀七萬二千兩實屬不敷支放著吳振械查明前項奏撥銀兩除已經起解外其餘未解銀十三萬兩仍行籌款撥解貴州軍營毋誤要需將此由六百里諭令知之○諭前以貴州南北兩路賊匪蠢動諭令蔣爵遠不得株守札佐並諭趙萬春等先剿遵義匪徒其興義一帶實成金剛保福連剿辦本日據吳振械奏賊氛逼近滇省見於平彝等處設防並據蔣爵遠等奏收復安南普安兩城金剛保督兵進援興義賊鋒雖挫府城尙未解圍至遵義桐梓仁懷有無接仗未據提及該撫等前後所調官兵爲數不少茲已諭令賂秉章

由湖南調派勁兵一千名迅速赴黔並諭樂斌將綦江合江防堵之兵卽行前進合力兜剿胡林翼見在帶兵由湖北追賊東下未能調回黔省該撫惟當懷遵前旨不得株守札佐卽與趙萬春等就見有兵力迅將遵義等處賊黨全數痛殲勿得專盼援兵遷延時日其金剛保福連所帶兵勇亦恐單薄並著分兵協剿若興義竄匪擾入滇境朕惟將蔣霽遠等是問有人奏桐梓之賊起釁根由並該撫等遷延畏葸以致賊匪橫行若如所奏是該巡撫提督縱寇失機實堪痛恨著照所參據實覆奏勿謂貴州距京寫遠朕無聞知也原摺著鈔給閱看黔省需餉已令吳振械趕緊籌解並有旨諭恆春卽赴總督任矣闔門殉節之已革署普安縣崇景已降旨議卹惟據吳振械奏該革員係自縊殉難情節不符著蔣霽遠再行確查具奏將此由六百里加緊諭令知之○欽差工部右侍

郎載齡等奏遵查四川學政何紹基考規嚴肅無賁緣交結之人
惟名士自居未免睥睨羣倫輿論尙許其公平官場競皆其乖僻
得旨所論尙爲平允旣無別項劣迹著毋庸議○己亥諭內閣朕
惟察吏所以安民守令之賢否與閭閻之疾苦呼吸相關各直省
督撫於屬吏之循良者卽宜覈實保奏其劣迹昭著各員尤宜指
款嚴參從重懲辦以儆效尤近日各督撫於地方官執法營私貪
汙卑鄙往往未能破除情面嚴行參劾卽或事經發覺難於掩護
亦第以聲名平常年力衰老等語含糊入奏在被參者旣以所劾
之不當轉肆恣睢其未參者復以大吏之摸稜愈無忌憚道府則
收受苞苴州縣則爭爲朘削鑽營奔走朋比爲奸吏治尙可問乎
嗣後各直省督撫務宜正以持身使屬吏皆知畏憚廉隅自飭恪
守官箴其有因循疲玩罔知自愛者必當據實指參按律懲辦斷

不准避重就輕僅予罷斥顛預了事用副朕勤求治理整頓官方之至意將此通諭知之○諭慶錫奏借用庫款銀兩擬按市價折錢歸還等語著交柏棧查明是否可行奏明辦理其所稱各商呈繳大錢請作爲銅斤交局著一併查覈妥辦至慶錫前次奏請改鑄當十當五銅鐵錢文搭放兵餉當降旨飭令會同地方官試辦並著柏棧體察情形悉心籌議以期兵民兩有裨益有無應行變通之處卽行詳細酌覈具奏○庚子勝保等奏連日進攻賊死守堅城勢難得手惟俟地道開成出其不意方有把握得旨並無確實把握實深憤悶○托明阿等奏攻毀虹橋賊壘並設法攻取瓜州得旨此次獲勝尙屬得手惟逆情詭譎難保無潰而復聚總須慎重堵剿杜賊外援以期克復瓜州○辛丑諭軍機大臣等前因劉玉豹賊紆青所帶兵勇連奪大小關直抵桐城該處爲安慶廬

舒往來要路我軍一經孤入恐有挫失曾諭令和春等飭秦定三分兵進紮關隘爲臧紆青等應援茲閱袁甲三等奏十一月十三日以後連日轉戰情形先獲勝仗後因安慶潛山兩處援賊麇至城內之賊復分門出擾兵勇三面受敵以致臧紆青力竭身殉劉玉豹退駐六安垂得之城未能收復固屬可惜而軍威旣挫廬舒以南道路復梗於皖省大局甚有關繫和春等爲廬郡之賊所牽掣日久未能攻克復不能派兵援應袁甲三坐守臨淮一籌莫展虛張聲勢名爲兼顧大局實則畏葸自保思之實深痛恨與和春等厥咎維均桐城北達舒城南距安慶東西接壤潛山廬江均屬不遠和春等大營兵勇較多著趕緊抽撥前往策應以贖前愆若不肯踰越廬舒一步致令賊氛逼近豫境或由他處北竄惟和春福濟袁甲三是問袁甲三扼守臨淮一帶豈不可就近兼顧六安

該處本有知州茅念劬糾集鄉團著飭劉玉豹重整聲威再
取張維翰見在歸德辦理勦匪事宜其前調河南防兵幫同
防守正陽六安等處已據英桂奏統歸牛鑑管帶著袁甲三飛札
提催毋任遲誤總之大軍爲賊牽掣若更旁竄蔓延該提督等自
問當得何罪爾等亦須統籌全局勿但專顧一隅也將此由六百
里加緊各諭令知之○諭本日據袁甲三等奏攻勦桐城逆匪賊
紆青力竭殉難劉玉豹退駐六安係因安慶潛山等處賊匪分股
往援是潛太一路賊已無多而安慶之賊分往桐城似有可乘之
機見在曾國藩等水陸各軍相距尙遠著楊需督帶兵勇相機前
進直擣安慶翼可斷賊援應克復城池該督務當妥計速籌趨程
前進不可稍存畛域之見致失機宜將此由六百里加緊諭令知
之○諭前據英桂奏派令牛鑑帶兵赴皖並張維翰接辦歸德防

勦尙爲得力本日據袁甲三等奏官兵攻勦桐城逆匪轉戰數日
以賊黨屬至致有挫失皖豫交界地方皆宜嚴加防範其與六安
交界處所難保不乘機窺伺總兵邱聯恩駐兵固始原以援應六
安卽可飭令該員帶兵進勦或另行酌撥官兵前往截擊以勦爲
堵至歸德一路尤關緊要張維翰帶兵駐紮該處勦辦捻匪是否
已就肅清見在皖省情形緊急著卽嚴飭該員確探前路消息相
機進勦力遏賊匪北竄之路並著牛鑑等帶兵迅速赴皖合力進
攻所有輝縣抗糧一案著英桂飭令該地方官妥爲辦理該撫務
當卽日帶兵出省扼要防堵毋稍延誤將此由六百里加緊諭令
知之○贈安徽桐城陣亡四品頂帶舉人臧紆青三品銜予祭葬
世職○壬寅諭軍機大臣等昨因袁甲三奏安慶潛山賊匪分往
桐城諭令楊需乘機前進直擣安慶賊巢既可牽制逆賊北竄並

可爲曾國藩等前路聲援此等機會萬不可失本日據楊霽奏卽
日進駐廣濟布置妥協至曾國藩水師營面商等語自係尙未接
奉疊次飭令該督赴皖會剿諭旨此時潯郡江面據曾國藩等奏
業已肅清塔齊布由小池口渡江紮營於九江東門外水師前隊
亦堵扼湖口該督復派王國才帶兵四千馳赴黃梅由曾國藩等
調遣胡林翼帶兵二千由瑞昌至南昌以拊九江之背大兵雲集
不難克復九江郡城惟安慶至桐城一帶賊匪任意往來毫無堵
截和春等旣未能分兵截剿劉玉豹之兵又退駐六安此時北岸
情形頗爲緊要所有九江湖口之賊卽責成曾國藩塔齊布等剿
辦該督務當懍遵疊次諭旨迅速前進力破安慶等處賊巢並隨
時知照和春福濟秦定三等合力兜擊以期肅清皖境並著該督
飭令胡林翼等嚴防潯江賊匪上竄楚境以杜紛擾將此由六百

里加緊諭令知之○諭見在曾國藩已駐軍九江城外與塔齊布會合扼守湖口內外要隘又據楊需奏賊中兇悍頭目皆在安徽江西等處長髮老賊亦多上竄江甯等城勢必空虛請飭乘機攻剿等語所奏不爲無見該逆死黨半在楚皖今既疊受懲創卽金陵等處賊匪亦必聞風破膽若托明阿向榮等能將金陵鎮江等城攻破並盡殲瓜州逆匪卽上游竄匪必思還救楚師從而壓之自成建瓴破竹之勢向榮前奏金陵賊黨仍踞上方橋雖經兵勇襲破木柵未聞續獲勝仗余萬清在鎮江僅能攻毀該逆礮臺終未斷其往來之路托明阿等攻剿瓜州亦未得手日復一日伊於胡底著該大臣等嚴飭水師攻毀賊匪鐵練埭除江上賊營水陸並進明攻暗襲將金陵鎮江瓜州等處次第克復如能先復一城則賊匪已覺喪膽而曾國藩等督兵東下剿辦更易爲力托明阿

等與向榮見已聲勢聯絡當不至互相觀望重負委任也將此由
六百里加緊各諭令知之○僧格林沁等奏連鎮賊匪於十一月
二十四日被剿後益形窮蹙自二十九日至十二月初四等日時
時出巢撲擾均被官兵隨時擊退斃賊多寡不等誤踏地雷轟斃
者亦屬不少近日陸續投誠者其計二百餘名初三初四等日臣
派員帶領六品頂帶施紹恆並投誠人進凜誘賊調撥隊伍以備
截殺施紹恆等直至賊壘叫罵該逆卽結隊出巢施紹恆等退至
寬敞處開槍迎擊投誠之人無不奮勇刀矛並進斃賊數十餘名
大股逆匪復出巢蟻擁而來施紹恆等一字排列擎槍以待時逆
匪僞檢點黃姓突出陣前礮臺官兵卽對準開放大礮當將該逆
擊斃賊眾敗退回巢查僞檢點黃姓最爲狡悍此次被礮轟斃實
屬大快人心林逆失此一人益形喪膽見在惟有兩廣人及沿途

裏脅監犯共有千餘名與林瀾詳結成死黨牢不可破其兩湖等處之人屢次奔撲傷亡過多又因施紹恆等投出得有頂帶續有投出之人亦皆溫飽是以心存觀望乘閒俱要投出林逆亦深知人心不固恐生他變遇有投出之人被該逆拏回不但不加殺害且自責無能以致眾人受困給予銀兩仍令投出該逆當此萬分窮蹙之時尙能如此狡猾實非尋常賊犯可比臣等業將林逆詭詐情形傳知各營官兵不得因賊勢已窮稍涉大意臣等一面激勵各營文武趕緊籌畫一有可乘之機無分晝夜督兵進攻庶期一鼓蕩平以贖曠日持久之咎其駕馭投誠賊匪亦當格外畱心勿墮奸計見除施紹恆等畱營隨時進隊外其甫經投出各犯擬札交附近連鎮之景州吳橋交河德州等處防堵各營分營管束以免疏虞報聞○癸卯諭內閣前因黃宗漢摺報遲延於地方緊

要事件多未陳奏降旨將該督先行議處降爲二品頂帶茲據該督奏稱奏報久稽自請嚴加譴責並另摺聲稱海塘衝塌未能豫防學政丁憂臬司出缺未及馳報請嚴加議處等語海塘決口關係民生雖經該督設法搶護堵築平穩究屬未能先事豫防至該省摺報稽延已久該督旣已病痊卽應趕緊入奏乃自上月具文咨報軍機處後又復遲至一月有餘亦屬咎有應得姑念該督在浙平日辦事本屬認真此次奏報雖遲於地方公事尙無貽誤業經降爲二品頂帶以示薄懲所有自請交部嚴議之處著加恩改爲議處○諭黃宗漢奏浙省各屬成災大概情形一摺本年六七月間嘉興等十一廳縣先後被風被雨金華等十一縣被風被旱至閏七月間仁和等五十餘州縣復疊被風雨以致田禾受傷秋收歉薄並因山水暴漲洪潮漫溢致有衝塌房舍淹斃人口之處

雖經黃宗漢率屬勸捐量爲撫卹惟低窪地畝能否卽時涸復被災黎庶恐致流離失所朕軫念民依實深憫惻著何桂清迅速派員徧行履勘卽將成災地畝應行分別蠲緩之處奏明請旨候朕施恩○諭邵燦奏請飭催海船裝運漕糧等語見在江浙兩省新漕均由劉河海口起運北上所有載運船隻亟應寬爲雇備以免貽誤著盛京將軍直隸總督山東巡撫迅飭所屬將沿海各口停泊之上海甯波沙船蜆船並東衛各項船隻飭令剋日駕赴劉河海口以便收載新漕及早開洋北運儻該商船等居奇勒措或中道逗畱卽著查照舊章懲辦○新授四川總督黃宗漢奏報謝恩得旨汝非不能振作者不料汝此次有意耽延稽壓奏牘雖降頂帶示懲朕尙望汝痛加悛改若抵川後故態復作是汝無福不能仰副委任也○調福建兵一千名赴廣東剿賊○准浙江台處等

幫緩交賠欠耗米○甲辰諭內閣前據御史伍輔祥奏參四川道員知縣黃綠貪鄙各款當交載齡等確查參奏茲據查明建昌道俞文詔需索陋規得受賄賄雖無實據惟於首府任內時常演戲譙會又爲總督裕瑞所信任遇有酌委等事不免與議以致聲名狼藉宜賓縣徐繼鏞與俞文詔交結甚密歷調大缺不協公論萬全縣知縣萬年清隨同俞文詔辦理鹽務遽請調濟繁要署理德陽縣事業經撤任該二員性情卑鄙難膺民社俞文詔徐繼鏞業經革職無庸另議萬年清著卽革職○乙巳諭軍機大臣等吳振械奏密陳趙萬春畏葸遷延情形並請撤回滇黔調出征兵各一摺該署督因近日兩湖賊匪肅清欲將頻年奉調出征未經歸伍之兵丁一千數百名先行撤回自係爲防剿起見見在江皖等處剿賊正當喫緊此項征兵無論勢難遽撤卽使飭令撤回而跋涉

道途耽延時日亦有緩不濟急之勢本日據樂斌奏川省官兵攻
剿黔匪疊獲勝仗署臬司曹澍鍾總兵阜陞擬由石壕等處分三
路進兵爲夾攻桐梓克復仁懷之計見又嚴飭萬福迅速前進加
以滇黔兩省前後所調兵數遵義一帶足敷剿辦惟安南普安雖
均收復興義賊氛未退平彝羅平各要隘該署督務當勸集鄉練
擇地設防毋令匪蹤闖入滇境王國才見經楊霈派令帶兵取道
黃梅馳赴曾國藩等軍營協同剿賊此時亦未能卽令回滇吳振
械兼署總督統轄兩省著另選得力將領帶兵出剿毋稍貽誤將
此由五百里諭令知之○諭前因剿辦仁懷桐梓賊匪諭令樂斌
卽飭萬福等將綦江合江等處防兵統帶前進合力夾攻茲據吳
振械奏提督趙萬春畏葸遷延見在雷臺山雖小有斬獲並未得
手等語提督統轄全軍見當剿賊喫緊之時若臨事畏縮何以使

將士爭先用命況該撫等所調官兵爲數不少各省籌餉亦數逾鉅萬若該提督一味退縮糜餉老師咎將誰執著蔣爵遠卽嚴查該提督見在帶兵剿賊布置能否周妥如有畏縮情弊卽著據實嚴參不准稍有徇隱仍一面飛催萬福統帶川兵至黔合剿其前調湖南官兵並著一體飛催毋稍延誤將此由六百里諭令知之

○丙午諭內閣恭親王奕訢等奏遵旨會議載齡等奏請查辦州縣侵吞捐項一摺各直省勸諭捐輸原因軍餉浩繁藉資民力上年曾諭令各督撫查有墨吏奸胥藉端擾累苛派侵吞者嚴參懲辦乃近來山西陝西四川等省不肖州縣竟敢侵吞冒蝕累萬盈千甚至小民捐輸銀錢並不詳報輒作地方公舉以爲開銷地步各該督撫或壅於見聞或憚於舉發不肖官吏愈肆貪婪而小民急公好義之心亦無由上達蠹國病民深堪痛恨自應嚴定章程

以昭覈實著照所擬嗣後各直省勸諭捐輸仍責成幫辦團練之紳書會同地方官妥爲勸導各該督撫隨時稽查如有買屬徇勒等弊卽親提審辦有犯必懲所捐銀兩按照戶部例定期造冊專案報部並照廣東見辦章程分別奏報其有應加中額學額之處並著該督撫迅速奏請恩施應領執照著該部速行發給俾各捐生等早邀甄敘庶幾踴躍輸將並可嚴杜侵吞之弊經此次部定章程之後如地方官有動用捐款藉詞修廟及地方公事開銷者照贓私例治罪仍責令照數賠繳各督撫遇有侵吞捐項之員自行查明參奏卽免其議處儻或扶同徇隱別經發覺其應得處分卽以私罪論決不寬貸各該督撫等卽將此旨刊刻謄黃徧行曉諭俾比戶皆知以杜侵漁而資激勸○諭景壽基溥奏值班疏忽致令不知姓名人犯溷入宮禁自請從重治罪一摺昨日申刻

據總管太監等奏拏獲外閒不知姓名人犯一名當有旨交巡防大臣審訊供係正白旗蒙古馬甲富升宮內重地門禁森嚴豈容閒雜人等溷入景壽基溥昨日在景運門隆宗門值班未能督率該班之章京護軍等認真稽察所司何事可見平時值班漫不經心形同蟬贖實非尋常疏忽可比景壽著先行革去御前侍衛散秩大臣正藍旗蒙古副都統基溥著先行革去刑部右侍郎總管內務府大臣正藍旗護軍統領正白旗滿洲副都統景壽基溥一切差使並著全行革退俟定案時再降諭旨○勝保奏高唐賊情窮蹙足可就此殄滅見擬日內挑選兵勇乘夜進攻得旨仍是希圖塘塞可惡之至較量連鎮高唐賊踞先後是自掩其失尤屬可笑○丁未諭內閣仁壽奏參失察溷入宮禁人犯之值班章京侍衛並自請嚴議議處一摺該犯富升擅入宮禁據供係由內右門

潛行溷入該章京侍衛等未能及時查拏實非尋常疏忽可比所有是日內右門值班之正黃旗章京文恆侍衛額爾格春文瑞彥淩文善德恆英祥額勒和訥承忠孫清剛穆玉成均著先行革職乾清門內左門值班之鑲黃旗章京惠增侍衛恩綬奕楓溥莊溥蘭德昂篤文瑞廣福蘇克東阿常林正白旗章京壽善侍衛訥蘇肯特保祥玉桂林伊鏗額和義海全慶祥張應登會英均著先行交部議處惇郡王奕誼怡親王載垣均著先行交部嚴加議處睿親王仁壽鄭親王端華恭親王奕訢德木楚克札布著先行交部議處補進領內侍衛內大臣班之理藩院尙書公奕湘並著先行交部嚴加議處是日進班之貝子載華散秩大臣松岫副都統都爾連阿太僕寺卿八十二著一併交部議處○以團練出力永廣湖南平江縣學額三名○戊申 上詣 天神壇祈雪○諭內閣

本日據軍機大臣面奏章京吳台朗於昨日向恭親王奕訢等稟稱章京程恭壽將柏後審辦夥買木植案內達謹等供單私令供事鈔錄送與慶錫家人當將該員等傳齊質問委無確據提訊該班供事僉稱程恭壽並未令伊等另行鈔錄再三詰究吳台朗亦自認懷疑願甘息事復據程恭壽呈出自行鈔錄載齡等所奏沈祖望遺筆一紙而於此次鈔錄供單堅不承認吳台朗意存攻訐迨查無確據輒敢起滅自由謬妄已極程恭壽於此案犯供雖查無私鈔實據其呈出之件亦係查辦要案豈應鈔錄傳播其平日不知慎密已屬可見光祿寺少卿程恭壽禮部郎中吳台朗均著卽行革職○諭王懿德等奏琉球國貢使籲懇仍准入都一摺前以用兵省分尙未肅清諭令琉球使臣無庸繞道來京以示體恤茲據王懿德等奏據該國貢使等稟稱此次除例進貢物外尙有

謝恩及恭賀表章仍祈准予入都藉達下忱等語該貢使等殷殷
顙懇其意實出至誠若必令其毋庸來京非所以慰遠人之嚮慕
著王懿德等俟來歲道路疏通卽派員護送該貢使等赴京俾輸
忱悃○己酉曾國藩塔齊布奏逆黨被剿後羅大綱奔踞湖口與
九江踞賊遙相犄角牽掣我軍其小池口敗賊由彭澤渡江繞道
赴潯增壘濬濠爲死守計湖口之賊自搶得江西戰船後連檣結
筏圍截內河東岸爲湖口縣城依踞獅子山連紮數營西岸爲梅
家洲連紮二營木城礮臺緊相依護水師左營彭玉麟嚮導營孫
昌國等直紮湖口以內前營李孟羣後營蕭捷三中營秦國祿及
各營戰船分扼由湖出江之口扁擔峽梅家洲並北岸之八里江
口一帶層層關鎖如犬牙之交錯自十五接仗後十六十七十八
等日水師屢捷焚毀賊營數座二十日夜二更後風順水流忽見

上游火船分十餘起縱火下放礮船隨之兩岸出隊千餘人呼聲鼎沸兼放火箭火毬時彭玉麟孫昌國兩營之泊內河者早經準備屹然不動李孟羣等各駕三板迎擊秦國祿等繼進撥開火路將已然之船用篙撐入中流向空濶下我戰船反迎火光而上向岸賊開礮放箭之處併力攢擊斃賊無數且攻且追至木簕之側忽又擁出火船數起火藥不時轟發我軍疾趨而進燒賊礮船十五六號賊黨紛紛墮水隨火船同付東流當賊放火燒舟時天陰月黑三更後月明如晝該逆油葦之船與我軍焚賊之船火光照耀秋毫畢見賊黨計窮四更收隊我軍一無所傷陸路官軍自與水軍會於小池口十八日臣塔齊布從上游琵琶亭渡江次日移營南門外適胡林翼帶勇二千人馳至分紮要隘二十一日羅澤南從下游水港渡江以期上下夾擊賊趁我軍半渡突出數千人

分路來撲羅澤南督同李續賓蔣益澧等分投迎剿時賊眾我寡官軍殊死戰殪其前鋒賊遂敗退伏賊繼進移時又敗羅澤南從寶塔灣進追沿途趕殺百餘名偪溺老鶴塘內者約二百餘名追奔十里之遙其接渡之戰船亦遂泝江而上向岸轟破斃賊甚多軍功蔣昌梧係督臣楊需從漢川招撫者也自帶精勇百人在羅澤南隊前匹馬衝突追賊尤奮焚毀城外賊營二座至九華門外賊營一座尤爲堅固各勇大呼撲入拋擲火彈火毬斃賊無算逆黨奔竄聲若潰隄詎該逆暗埋地雷於營內延燒所及烈燄轟騰我軍之撲營者猝被燒傷十餘人敗賊之奔入北門者城內賊目持刀督截賊黨衝出各勇見我軍前隊被燒而賊眾回頭來撲遂相率退奔羅澤南勒馬小駐揮令在後者無許續追在前者無許再退且駐且戰回至岳師門外羅澤南右臂及手指再受石傷力

揮諸勇衝進殲賊十數名賊眾盡靡乃從容收隊紮營白水港二
十七日水師各營會合出隊舟抵湖口城邊見該逆於城下沙洲
密排巨木橫繫筏纜數道聯絡於對岸賊營之下戰船數十隻排
列纜邊開礮抵禦子如雨密各三板回舵收泊示之以弱別遣數
舟衝入賊隊誘令出巢該逆開船迎敵各營遂揚帆疾進攢礮聚
攻前三板衝過賊陣之前砍斷巨纜乘勢轟擊斃賊不少該逆力
不能支紛紛竄水各船追逼直抵南岸洲尾轟斃岸賊尤多賊遂
棄營內奔惜陸兵未到未踏其營時上游忽有賊船救應依附營
牆之下木簞之旁相礮更密我軍從煙燄之中搶入迎擊斃賊約
百餘名燒其戰船二隻賊始全數敗回傍晚收隊自此賊舟不敢
拒敵夜夜以陸賊千餘大呼驚營我軍徹夜戒嚴不得安枕伏查
官軍自大破田鎮之後私擬九江一郡指日可破不料賊數日增

尙能負固死守其堅悍兇頑實出意計之外連日陸軍攻城傷亡甚眾因攻其未備擬卽先剿湖口孤塘之賊翦其羽翼水軍在湖口與賊相持李孟羣之意欲令賊船放出大江下游免其內竄江西分我兵力彭玉麟之意以爲賊奪江西礮船縱之出江其禍愈烈必欲嚴扼此關聚而殲諸鄱湖之內俟陸軍到時再行相機辦理此次水陸兵勇冒險深入奮不顧身籲懇 天恩由 臣等擇尤保敘以固士氣干總會獻成把總周福友外委羅嘉典追賊過猛力戰捐軀深堪惻惻應請飭部從優議卹 上諭軍機大臣等我軍自肅清潯江進扼湖口以後滿擬九江郡城乘勝可克乃連日焚毀賊船踏破賊壘而該逆死黨仍負固拒守殊屬兇悍雖此股逆匪多有由楚敗竄之老賊盤踞其中亦由江西兵力軟弱未能兩路夾攻以致驟難克復塔齊布雖已渡江與曾國藩會合紮營

城外胡林翼之勇亦已分布要隘而岸邊之逆船既堅匿不出城中之逆眾亦設備甚嚴見在李孟羣欲放出賊船免分兵力彭玉麟欲嚴扼關隘聚而殲旃惟陸軍尙未到齊攻具亦未齊備賊情變幻靡常著會國藩塔齊布相機籌畫不可稍有孟浪致誤事機吳城賊未擊退該處距省甚近陳啟邁所派之惲光宸趙如勝等均係督勦之員何以自前月奏報籌辦會勦以後未據該撫續行入奏豈賊竄江境該臬司等竟敢置之度外專恃會國藩等分兵應援耶著陳啟邁一面嚴密設防一面飭令惲光宸等迅速將吳城賊匪擊退以便與會國藩等軍併圖攻勦會國藩等卽先勦湖口孤塘之賊翦其羽翼仍設法攻城以期收復此次冒險深入之員弁兵勇等准會國藩塔齊布擇尤保奏所有陣亡之藍翎千總曾獻成藍翎把總周福友藍翎外委羅嘉典均著交部從優議卹

將此由六百里加緊各諭令知之○諭向榮等奏軍餉不支請飭江西等省迅速籌解一摺江甯鎮江兩處軍餉江西協撥之款欠解者四十餘萬江蘇雖陸續協濟爲數無多本年尙有三箇月未放支絀萬分見當攻剿喫緊豈可稍使缺乏著陳啟邁迅將本年三月以後欠解之款設法卽日籌解毋再遲延至江蘇剿辦上海賊匪及供支鎮江水陸各營墊給紅單船餉在在均關緊要並著怡良吉爾杭阿王懿德呂佺孫於閩省海關及江蘇浙甯關稅銀內每月各撥二萬兩按期委員解赴江南大營以濟要需該督撫等務當悉心妥籌源源接濟毋得藉詞推諉致誤軍儲將此由六百里各諭令知之○諭向榮等奏大營軍火緊急請飭提解等語見在江甯大營水陸進剿正當萬分喫緊之際紅單花管各船均係大礮藥尤多若不及早寬爲籌備致軍火不能接濟於攻剿

事宜關繫甚鉅著山西陝西河南各巡撫各提撥火藥三萬斤配足鉛子火繩趕緊派委妥員解赴江甯軍營並將起解日期先行具奏毋稍遲誤將此由六百里加緊各諭令知之○庚戌諭內閣前因貴州匪徒滋事攻陷桐梓仁懷擾及遵義其興義府屬亦有賊匪蠢動諭令該撫蔣霽遠提督趙萬春督兵赴遵義進剿並諭該巡撫等嚴飭將弁趕緊將興義股匪全數殄除前據奏報收復普安安南兩處城池興義尙未肅清本日據樂斌奏稱提督萬福由合江進剿黔匪進至大壩河賊首巢穴焚其住屋殲斃五百餘名生擒三十五名奪獲槍礮旗幟不計其數又於貓鼻巖經署守備劉華等追殺四十餘名生擒二十七名轟死三四百人遂卽圍攻梁村礮火轟斃及砍斃賊匪七八百名並砍死僞將軍曾六等三名乘勝直抵賊巢將火藥硝磺米石盡數焚燒參將高克謙署

守備王偉庭等復在大雷坡三峰山大坪山一帶殲斃賊匪多名
拏獲賊首夥賊一併正法各等語此股賊匪在貴州北境滋擾蔣
爵遠帶兵出省駐守札佐趙萬春馳赴遵義勦辦均未得手以致
餘匪竄近四川境者尙復不少該巡撫提督有統轄全省之責當
該匪初起之時旣未能卽時撲滅及帶兵勦捕又不能迅速成功
致令蔓延殊堪痛恨蔣爵遠著革職畱任趙萬春著卽革職仍畱
軍營以觀後效見在四川提督萬福已帶兵由蜀赴黔所有貴州
官兵均歸萬福統帶著蔣爵遠會同萬福將遵義一帶賊匪迅速
殲除其與義匪徒並著該撫嚴飭帶兵文武剋期撲滅毋再遲延
致干重罪○辛亥諭內閣前因馬甲富升瀾入宮禁當將景運門
隆宗門值班疏忽之御前侍衛署護軍統領景壽刑部右侍郎護
軍統領基溥差使全行革退並俟定案時再降諭旨茲據巡防王

大臣等將該犯富升審擬罪名具奏業經照擬處絞矣景壽等疏於覺察咎無可辭景壽著再罰額駙俸二年基溥業已革職加恩著無庸議宮禁重地理宜嚴肅曾經疊降諭旨申明門禁乃該班官兵等輒視爲具文漫不經心可惡之至經此次嚴懲之後所有內外各門值班及每日進班之王大臣等務宜督率各該章京侍衛及兵丁等嚴密稽察毋許稍有疏懈儻敢仍前玩泄致有閒雜人等溷迹出入必將是日值班大臣官兵等從重懲處不貸○和春等奏報攻剿舒城等處賊匪獲勝情形得旨三城未下日久遷延和春等擁兵攻剿廬州不能顧及他處自問所辦何事稍有天良亦知愧憤否○福濟奏皖省土匪充斥經陸希湜張家駒於十一月初三日由豫省界溝折回亳州城分赴各處督率兵勇窮搜首先拏獲捻匪王大柱等又獲捻首李灝等八十餘名又在石家

瑩拏獲屢次抗官之石洪等二十餘名丁家花園等處拏獲丁科
信等三十餘名觀音堂拏獲王大申張明善等十餘名立德寺等
處拏獲張幅海馬老虎卽馬鳴寅等五十餘名白龍王廟等處拏
獲鄧寶賢梅月士等三十餘名莊兒集拏獲李霸王卽李家青等
二十餘名共擣毀賊巢二十餘處查此股捻匪嘯聚靡常官兵急
於按捕或潛往他處或溷充練丁一經撤防旋又嘯聚况值楚北
敗匪窮極竄逃萬一與豫皖捻匪勾通則辦理益多枝節臣嚴飭
陸希湜等迅拏餘黨復飭合定壽鳳各營縣一體兜擒一面通飭
團練不准容畱匪類貽害養癰並咨英桂袁甲三督飭張維翰張
家駒等帶兵會剿務期全數弋獲以免勾結而靖地方報聞又奏
年終密考請俟下年補奏得旨如有才能超卓者儘可隨時具奏
○命已革江西巡撫張芾往安徽軍營交和春差委○予安徽殉

節知州李承恩等祭葬世職○壬子諭軍機大臣等本日據王茂
蔭奏大江南北捐局過多官私錯雜揚州以下沿江各府州縣設
有十餘局苛斂行商過客假公濟私包送違禁貨物甚致聚眾斂
錢以錢聚眾普安辭家港等局竟至互圖併吞大肆爭鬪商民無
不受害等語雷以誠摺議捐釐協濟軍餉原在揚州一帶辦理尙
屬妥協何以普安等局竟有收捐未解糧臺之弊著托明阿等確
切訪查如有奸徒藉端漁利藐法營私卽著飭令該地方官嚴行
究辦其在大江以南者並卽移咨怡良就近查明如係私設卽行
嚴禁務期濟餉安民兩無窒礙原摺單著鈔給閱看將此由四百
里諭知托明阿陳金綬雷以誠並傳諭文煜知之○諭陳啟邁奏
吳城賊匪退竄官軍進紮南康並廣東匪徒攻撲定南龍南勦辦
獲勝各摺片此次賊匪夤夜退竄並非大受懲創卽官軍追至南

康斬獲亦不甚多該撫慮其去而復來欲嚴扼南康防其回竄吳城饒郡之路固爲腹地緊要起見但賊踞九江湖口被我軍水陸堵截豈肯甘心就戮楚省兵勇轉戰已久昨閱曾國藩等所奏潯郡城池似尙未能卽克該撫派往協剿之佈克慎恩齡所帶兵勇不過七百餘人能否自成一隊接應楚軍吳錫光旣能奮勇出力豈可轉使株守南康不令出湖夾擊著陳啟邁卽行體察情形妥籌迎剿一面嚴守省城要隘防賊回竄不得以本省地方專委楚軍也韶州匪徒竄撲江西邊境雖經攻剿敗竄亦未能拔除淨盡該撫前奏挑選壯勇進駐始興救援韶郡嗣後情形未據續奏葉名琛前奏韶城於八月十四日解圍駱秉章奏則稱十月初間府城又復被圍該撫此次所奏定南龍南勝仗已在十一月初間其爲韶州兵力不能兼顧以致蔓延鄰省已屬無疑該撫前派往

始興之勇見在何處務須飭令帶勇各員與廣東兵勇聯絡攻剿
不得專防本境其由鄱湖入饒州水路及由安徽建德入饒州小
路均著一體嚴防毋致顧此失彼另摺奏刁徒藉端訛詐見在出
示嚴禁一摺卽著照所議辦理地方刁悍之徒挾仇告訐在平時
猶應嚴辦況當人心未定民氣未復之時豈可稍存輕縱卽實在
甘心濟匪者亦應由地方官嚴密訪拏何得任其肆意搏噬魚肉
良善著該撫嚴飭各屬遇有此等案件自應從嚴懲辦其或挾嫌
誣告有意傾陷者亦當從重治罪以儆刁風而蘇民困將此由六
百里諭令知之○兵部等衙門奏遵議失察富升擅入宮禁照例
分別嚴議議處得旨惇郡王奕誼怡親王載垣均著加恩改爲革
職畱任仍各罰王俸一年奕湘著加恩改爲革職畱任仍罰公俸
一年革去內大臣所有此案失察之王大臣等應得處分均不准

其抵銷○癸丑諭軍機大臣等何紹基奏敬陳地方情形一摺據稱川省近年吏治廢弛前次錢糧津貼多徵少解者不下二三十州縣該學政衙門卽有控告安縣虧空倉穀一萬五千餘石會理州短解津貼銀四千八百餘兩之多又稱牧令中由科甲出身者不及一半一首府兩首縣均係捐班州縣中文理明通者甚少致詞訟拖延不結考試錄送文童多未通順著名庸劣之玉鈞全順任其戀棧等語各省官員科甲固未必盡賢捐班亦不皆無用原在該上司隨時查察舉劾公明吏治自有起色至於徵解錢糧聽斷詞訟是其專責若如所奏多徵少解者竟有二三十州縣之多甚至積壓案件錄送文童未能通順該省公事廢弛已極若不力求整頓尙復成何事體樂斌見署總督無所用其回護著照所奏情形確查具奏並查明玉鈞全順庸劣實迹據實嚴參無稍徇隱

原摺著鈔給閱看將此諭令知之尋奏錢糧徵多解少並未指明

何州何縣會理州安縣短解虧空各款均俟查明覈辦詞訟並未

積壓惟安安氏一案係已結復控業經提審覆訊錄送文童已飭

各屬嚴別棄取王鈞等均無實在劣迹報聞○以崇綸廉兆綸俱

爲內閣學士

崇綸由兩淮鹽運使廉兆綸由翰林院侍讀學士遷

○甲寅諭軍機大臣等勞

崇光惠慶奏匪徒竄撲全州經兵勇痛加剿洗一摺此次灌陽恭

城游匪經兵勇先後擊敗復糾另股匪徒由興安竄撲全州經廣

西湖南兵勇會剿該州境內已一律肅清惟當督飭地方官乘勢

將餘匪搜捕淨盡毋令再滋蔓延該省土匪充斥前奏荔浦修仁

陽朔永福永甯等處均有匪徒滋擾本日具奏永甯義甯兩處賊

匪均經擊退而荔浦等處如何剿辦情形並未敘及大墟土匪已

據該撫等奏稱督兵擊敗究竟近省一帶地方能否安謐殊深廑

念前有旨令勞崇光出境剿賊惟此時該省各屬匪徒聚散無常必當迅速撲滅省垣重地尤應妥爲鎮撫勞崇光著毋庸出省其梧州與廣東肇慶接壤處所卽著惠慶查看情形緩急帶兵馳往剿辦至本省防剿事宜仍著與該撫隨時知照毋得顧此失彼致令該匪日肆鴟張此次全州文武勦力同心將大股賊匪迅速掃蕩湖南兵勇越境會剿亦能不分畛域著勞崇光等擇其尤爲出力者酌量保奏候朕施恩將此由六百里諭令知之○予廣西陣亡知州吳文洲祭葬世職建祠訓導李宜春等祭葬世職○乙卯諭內閣刑部奏請畱捐復司員一摺所請殊屬非是該司員文啟等於承審戶部書吏用鈔抵銀一案不能悉心研鞫以致罪名互有出入例案生疏已可概見業經加恩准予捐復已屬從寬乃該部輒稱該員等熟悉部務並援照道光年間主事瑞珊之案奏請

留部試思該員等如果刑名熟諳何至派審重案含胡定讞且承審錯誤與瑞珊之失防監犯自盡情節迥不相侔尤不應率行援引捐復郎中文啟高士濂員外郎尙阿布並主事翟雲章均著不准畱於刑部仍歸吏部照例銓選刑部堂官著傳旨申飭○諭軍機大臣等英桂奏遵旨馳赴陳郡督防並派員進駐六安一摺皖豫交界防堵據該撫所奏三路布置情形尙屬周密惟袁甲三前派臧紆青等進攻桐城原以接應楚師此時劉玉豹雖退守六安一俟添派勁旅仍應迅速進剿英桂見派王庭蘭前往而可撥之兵僅止一二百名並以前派赴皖之兵傷病過多不過數十名可用擬令添募壯勇等語皖省需兵甚急著英桂卽飭令王庭蘭速行招募統帶前進不得稍事耽延至豫省各路官兵有無可以分撥交王庭蘭帶往之處仍著英桂通盤籌畫其赴皖兵勇口糧務

須源源接濟毋得以庫款竭蹶任令缺乏該撫卽著前赴陳州居中調度至歸德等處雖派令張維翰分投駐紮英桂仍當處處兼顧何路有警卽往何路策應斷不准株守一隅致滋貽誤輝縣抗糧之案仍嚴飭地方官妥爲辦理將此由五百里諭令知之○子江蘇殉節知縣張志等祭葬世職○丙辰諭內閣朕兄隱志郡王奕緯尙無子嗣著將奕紀之子宗室載中過繼與隱志郡王爲嗣封爲多羅貝勒○丁巳 上御撫辰殿大幄次賜蒙古王貝勒額駙呼圖克圖等宴並賞賚有差○諭內閣吳振械蔣爵遠奏官軍擊散新城賊匪並興義府城解圍一摺貴州安南縣賊匪涂令恆等先擾普安縣分防新城縣丞地方復分股竄撲興義府及貞豐州二城經吳振械等派令總兵金剛保帶兵赴援先由新城順道追剿斃賊百數十名十一月初三日賊撲興義府城知府張銑與

護遊擊守備汪光瑞激勵兵勇奮力夾擊斃賊千餘人生擒賊首
僞大王李狗狗僞元帥彭老三鄭福祥及夥匪一百五名其竄往
北鄉及坵腳地方賊眾經生員李士英等招集坵腳鄉民將首逆
涂令恆及要犯王丙熊喜刺斃並斬擒多名二十日張鎮會同金
剛保胡霖樹兵練馳赴北鄉分路進攻將該匪等圍至納勒地方
奮力轟擊殲斃僞元帥冉秉忠等七名生擒僞元帥將軍汪二生
蕭樂和等五名餘匪竄往卡憂寨踞險抗拒胡霖樹帶領敢死壯
練數十人密上山巔將火箭火彈燒焚賊寨引動賊設地雷斃賊
無數又貞豐州賊於十一月初一日徑撲州城被兵練擊退後復
在教廠山負隅抗拒知州蔣時濶密飭兵練兜剿斃賊數十人生
擒三十餘人其另股賊匪在安南縣屬滋擾蔣時濶會營馳往督
同鄉練截殺數十名生擒僞將軍涂令言等當卽正法此股賊匪

涂令恆等膽敢聚眾圍攻郡城該府張鏌督同文武竭力固守於官兵未到之先調練勦擊立解城圍並經生員李士英等將首逆設計殲斃辦理尙爲妥協道銜興義府知府張鏌前因屬縣疏防革職暫畱本任著卽開復原官原銜仍責令會同金剛保等將興義府屬巴林一帶另股賊匪及新城貞豐所有餘匪趕緊勦除淨盡以靖地方○戊午諭內閣貴人他他拉氏著封爲麗嬪索綽羅氏著封爲婉嬪○諭袁甲三等奏查明知縣收復城池懇恩開復等語前因土匪竄擾安徽鳳穎一帶當降旨將穎上縣知縣程鈺革職交袁甲三嚴切查明如有臨期逃避等情卽以軍法從事茲據奏稱該革員親赴正陽附近地方布置防堵不意賊繞他路遽撲縣城旋即星馳赴援各鄉團練萬人聞風踵至立將縣城收復竄無臨期逃避情事收復後復能屢挫賊鋒捍衛地方並查該革

員素著循聲民情愛戴程鉉著准其開復知縣原官仍畱安徽補用○諭軍機大臣等袁甲三等奏派員駐紮英霍相機會合楚師一摺前因攻剿桐城未能得手諭令和春撥兵援應並諭袁甲三兼顧六安原因會國藩等水陸大軍見攻九江若郡城克復赴皖甚速必須厚集兵力既可聯絡聲勢並可杜敗竄之匪乘閒北窺況廬舒各城尙未克復宿望太潛等縣均爲賊踞江北情形甚屬喫重袁甲三等見派何桂珍進駐英山招集鄉勇爲進剿太湖之計劉玉豹等由六安進駐霍山一俟楚師抵皖卽歸會國藩調遣自應如此辦理惟該員等所帶兵勇是否足資協剿臧紆青原帶各勇雖經袁甲三挑選能否得力和春等仍當隨時查看就近抽撥兵勇相機策應一面嚴飭該員等實力防剿探明楚師以圖會合夾擊前據英桂奏稱派王庭蘭進駐六安惟所帶兵僅一二百

名尙須添募壯勇此項兵勇並著袁甲三飛速催提毋任延宕和春等攻勦廬州秦定三圍攻舒城均係坐擁重兵日久未能克復前已於摺內嚴切批示儻再事遷延恐上游潰匪水陸麇至廬城賊匪勢更鴟張和春等自問當得何罪耶將此由六百里加緊各諭令知之○袁甲三奏永毫捻匪滋擾經張家駒先後捕斬首要多名復訪聞毫境附近之泥臺店觀音堂立德寺白龍王廟等處匪徒窩聚復分途接勦續獲王添坤陳作賓等首要各犯百餘名地方漸臻安靜張家駒遵札回營仍於蒙城一路酌畱兵勇二百餘人搜捕餘黨並經臣諄飭陸希湜一面會同張維翰無分畛域四面兜拏務使匪徒盡絕根株報聞○庚申諭內閣楊需奏請開復帶兵官員處分等語前任四川建昌鎮總兵福忻綏甯協副將雙保前在漢川等處勦賊失利降旨革職候補副都統魁玉候補

總兵楊昌泗前在蘄州三道橋地方不能扼截竄匪降旨摘去頂帶茲據奏稱該革員等被參後督兵打仗收復地方均能出力尙知愧奮福忻雙保均著開復原官魁玉楊昌泗均著賞還頂帶○諭楊需奏遵旨訊明提督參案一摺前經王慶雲奏參陝西固原提督桂明在清水鎮行營被賊燒失餉銀坐扣兵糧抵銷並令解餉委員沈恬捏報土匪劫掠當諭令楊需將此案就近提訊茲據訊明委員沈恬解餉到桂明行營被賊乘夜縱火餉銀遺失時值恩忙未能稟報明晰實無桂明捏令報爲土匪劫掠之事所失銀兩桂明先後墊賠因兵丁感桂明相待優厚願將應領餉銀按日坐扣糧員閻丕敏等遂將所失之銀照常造冊報銷委無別項情弊惟該提督於失事之時並未卽時據實具奏而所失之餉仍照報銷冊式造報究屬彌縫掩飾桂明著交部議處兼辦糧臺之平

遠協副將閻丕敏山丹營遊擊興貴高如岡辦理支發輒將所失之款作爲兵丁已領之款以冀造報符數雖非有心蒙混亦屬不合著一併交部議處委員從九品沈恬管解餉銀尙無失誤亦無誣捏別情著開復原官仍歸陝西照例補用○曾國藩塔齊布奏潯城北枕大江東南多山爲姑塘入城要路臣塔齊布率各營扼駐其上該逆亦嚴防東南潯水之處率將各路挖斷其西門一路築有大營一座木城數丈列礮三層倚龍開河以自固上月二十六至本月初一等日陸軍分門攻勦不能得手兵勇傷亡甚多參將童添雲夙稱驍勇是役中礮殞命臣等以窮寇死守我軍攻具未備不若舍堅而攻瑕因商派胡林翼羅澤南等先攻湖口對岸梅家洲賊營而調王國才及參將恆泰等由小池口渡江與南軍合營初五日胡林翼羅澤南等拔營前進王國才移紮臣塔齊布

大營之旁恆泰等分帶兵勇七百人尙在官牌峽江邊逆黨探知
突出邀截經恆泰奮力擊退遂移營城之東南與臣塔齊布等營
聯絡初七日逆黨四五千入分投出撲王國才營經王國才等擊
退一股而賊來愈眾勢將不支臣塔齊布整隊往援陣斬百名賊
遂奔竄東門入城閉門堅拒其自西城出者另有千餘賊攻撲居
隆阿江西營盤臣塔齊布飛飭副將周鳳山等帶勇往援一律擊
退胡林翼羅澤南之軍於初六日已刻行抵盔山距梅家洲八里
許梅家洲之尾爲闌湖觜江省內河出口之西岸也僞丞相羅大
綱踞焉湖口縣在其東岸僞易王石達開踞焉鄱湖之賊於口內
紮大木簰一座東岸厚築土城多安礮位西岸立木城二座高與
城等防守甚嚴我盔山之軍駐營甫定派隊前進胡林翼帶勇由
洲東入羅澤南帶勇由中路入李續賓張永實同蔣益澧等帶勇

從洲西入賊眾負固不出憑牆施放槍礮我兵伏地以進逼近壘前去其竹木以水潑其地雷哨長葉楚南等從竹籤木椿中踰溝而前直入賊營以路窄人少葉楚南等俱爲賊戕初七日梅家洲賊七八千人分三路進以攻我營之左腋而大姑塘之賊又以四千餘人撲我盩山大營之背胡林翼羅澤南等分營堵禦斃賊三百餘名賊乃大潰追奔十餘里沿途殺賊數百名至小湖而止水師之在湖口者聞陸軍一至卽出隊從外江進口攢礮環攻賊陣奮力進擊將其鐵鎖屢纜立時砍斷哨官劉國斌一礮轟中簞上藥箱巨煙突發響若山頽簞已然燒過半而未燒之一面賊仍開礮不絕我軍分一支鈔出立燒大戰船六隻民船二十餘隻賊之登岸者被李孟羣親軍截殺十餘名羅澤南之陸勇擊殺亦眾且放火助燒簞船水陸相輔是日血戰四時之久燒斃溺斃殲斃之

賊四百餘名奪獲大礮十餘位生擒一百十三名內有僞將軍梁國汝等皆係擐上賊目兇悍聚殲全軍爲之一快此次陸軍攻城攻壘水師攻陣攻卡冒險摧堅氣不稍餒守備劉國斌攻剿田鎮首先衝開鐵鎖此次焚陣又係首先衝入身受子傷守備孫昌國隨同彭玉麟屢次進攻身先士卒劉國斌孫昌國均請以都司卽補並賞換花翎其餘出力將弁兵勇籲懇 天恩容 臣等彙案保獎以固士心參將童添雲請飭部照參將陣亡例從優議卹把總葉楚南外委楊玉芳六品軍功黃韻南武生陳烈姜凌浩懇恩分別議卹以昭激勸楊需奏 臣到廣濟後探聞安慶望江諸賊皆聚於宿松分股竄擾黃梅當派參將劉富成等各帶兵勇馳赴黃梅堵剿初三日分路進攻直抵城下縱火焚燒城門城樓賊於東西兩門突出轉戰互有損傷初四初五等日疊次進攻賊閉門不出

十一日夜賊匪攻撲劉富成營盤卽督兵迎敵賊復鈔襲後路拋擲火彈焚燒營盤官兵盡力抵禦賊始敗退追逐十餘里劉富成營盤爲賊所燒退至石龍鋪駐紮該參將疏於防範應請摘去頂帶以示懲儆見在所調川兵及鄖陽兵尙未到營兵力甚單臣以九江得失爲吳楚安危所繫當全力拔之故盡揀精銳四千付王國才並飭胡林翼帶勇二千前往協助乃相持十餘日尙未能下而宿松之賊遂乘虛復竄黃梅安徽已革道員何桂珍經臣檄飭由英山進剿太湖並飭羅田縣彭仲芳帶勇援助於初八日會合啟程已抵太湖之野雞河地方必攻克太湖宿松方能與南北兩軍相併以目前情形而論必俟我軍攻克九江察看賊勢竄聚何方再與曾國藩塔齊布等熟商辦理 上諭逆賊占踞九江等處意欲牽掣我師東下經曾國藩等派兵分剿疊獲勝仗自不難悉

數殲除所有尤爲出力之守備劉國斌孫昌國均著以都司卽補並賞換花翎其餘出力員弁兵勇著曾國藩等據實保奏陣亡之參將童添雲著照參將陣亡例從優議卹把總葉楚南著照守備例議卹外委楊玉芳六品軍功黃韻南武生陳烈姜淩浩均著照把總例議卹○諭軍機大臣等逆賊以全力抗踞九江湖口而宿松之賊復分股竄擾黃梅牽掣北岸之師若非迅復九江水陸各軍不能會合非盡燬湖口賊船則九江不能卽克覽曾國藩等所奏情形雖屢獲勝仗攻克城池尙無把握楊需旣未能遽攻安慶而赴援黃梅之劉富成等又復不能得力北弱於南殊爲可慮楊需所稱必須九江掃蕩後方得確定行止所見甚是湖口賊船自以不放出口全數聚殲爲上策但恐江西力不能支一經內竄又分楚軍之力究應如何勦辦方免後患想曾國藩等已能籌畫萬

全楊需見駐廣濟卽著會合皖兵先取黃梅進取太湖宿松爲節
節打通之計湖北本境仍應兼顧不但防賊回竄卽按捕土匪安
定人心亦關緊要小池口及田家鎮等處要隘有無防兵能否與
南岸聯絡尤宜妥籌布置署提督豐紳已准其開缺該員所帶駐
紮襄陽之陝兵必須派一妥員管帶邱聯恩見在帶兵防堵固始
一帶皖豫接壤地方甚形喫緊河南帶兵武職見在乏人未便令
該員離省署事該督酌量派員署理可也將此由六百里加緊各
諭令知之○諭楊需奏施用水雷需用廣東水勇等語據稱仿製
西洋水雷擊賊船筏頗爲利器惟楚北水勇技藝不精廣東香山
澳門一帶有精於水性者見已咨行廣東選募著葉名琛等卽照
該督原咨速行選募刻日委員管帶赴楚交曾國藩等軍營應用
毋得稍有延緩將此由六百里諭令知之○諭奕格奏俄羅斯船

隻過境應否放行請旨遵辦等語俄羅斯與別國往來自應由外
海行走不能聽其取道內地惟本年五月閒該國船隻過境既經
放行此時若阻其歸路該國不免藉口又滋弊端著奕格隨時查
探如該國前此次經過之船仍由黑龍江等處駛回果於沿途地
方不至騷擾卽著聽其歸國毋庸攔阻若再有續來之船並非前
此經過船隻卽著妥爲開導告以內地江面不能聽外國船隻任
意往來此後斷不可再從黑龍江行駛致啟猜嫌總以剴切曉諭
爲要將此諭令知之○辛酉諭內閣和春福濟奏攻剿含山賊匪
克復縣城一摺十二月初九日編修李鴻章等督勇進攻守備俞
應彪等各帶兵勇分東西兩路迎擊賊勢大潰十二日聞賊在東
門築濠各兵勇及吉林馬隊分三路進攻殲斃無算計兩日殺賊
六七百人割去首級數十顆奪獲器械無數十四日派勇赴城下

設伏知縣孔繼黃密約被脅民人乘夜內應十五日夜攜帶攻具梯繩直至城下李鴻章帶勇潛伏復分打東西各門忽南城縋賊百餘李鴻章令談家寶暗處開槍逆屍紛紛隨落城內火藥忽發延燒民房賊自驚亂兵勇攀登擁進兜殺賊由南門竄出截殺二百餘名孔繼黃合力協剿共斃千餘人生擒十三人隨即正法奪獲旂槍刀矛等各數百件鉛藥硝磺二千餘斤救出脅從難民即將含山縣城收復所有此次出力之員弁兵勇著和春福濟擇尤保奏候朕施恩知縣孔繼黃外委楊占發隨同剿賊尙知愧奮所有應得失陷城池處分著加恩寬免○壬戌諭內閣樂斌奏川兵攻剿貴州下營等處賊匪續獲勝仗一摺貴州賊匪擾及川黔連界經樂斌派令官兵踰境攻剿自溫水汛剿洗賊巢獲勝後十一月二十五日署參將蔣玉龍等兵勇進剿至楊杠臺突有股匪二

三千人迎拒被我兵進擊潰散直撲下營賊巢槍礮齊施該匪退守我兵前後鈔擊羣賊無數當將賊巢焚毀餘匪竄匿署都司蕭聲遠等亦在羅漢壩等處接殺賊匪數十名生擒九名二十六日蔣玉龍等進剿糧米溝賊巢約三四千人拒敵我兵施放火器轟斃賊匪數十名生擒四十餘人奪獲旗幟礮械數十件該匪竄匿巖洞我兵用火藥柴草薰燒復斃二三百名將賊巢焚毀又署外委陳正順等帶同紳團攻剿張耳村等處賊匪殺斃數十名燒毀賊房數十間生擒首逆穆紹元子等當卽正法川兵踰境剿賊尙屬得手著卽督飭趕緊進攻克復桐梓仁懷以免蔓延所有打仗出力及生擒賊首官紳兵勇著該署督等擇尤彙案奏請恩施以昭激勸○諭軍機大臣等托明阿等奏浦口官兵擊賊並焦山艇師獲勝情形一摺近日瓜州鎮江等處沿江賊巢雖略有殲擒而

南北岸匪蹤尙復時來竄撲上下游賊船亦未斷絕往來江面豈能得手吳全美等不能迅將攔江鐵鍊燒毀致該逆又安列礮位紮成水營爲守護之計若再令占踞洲地浦口一帶堵剿更難武慶等連次接仗均爲賊礮所阻而攻鍊之水師尙須待風行駛雖經奪獲賊彈擊沈賊船不過小勝豈能遽慰朕懷著嚴飭武慶與吳全美等協同攻剿勿再遷延貽誤至托明阿等進攻瓜州僅能拋放火器使賊驚慌究竟或誘令出巢或設法進取並無把握卽鎮江南北夾攻轟塌賊隄賊樓總未直逼城門擣其巢穴著托明阿等督率陸路兵勇剋期攻復瓜州一面飭武慶等實力剿除該逆水營方爲勝算將此由六百里加緊諭令知之○癸亥禘祭太廟○僧格林沁等奏本月初十日丑刻連鎮逆匪大股向協領奎星保營牆奔撲勢極兇猛該協領督飭官兵開放槍礮侍郎瑞

麟等派兵協同攻擊各營齊開大礮當將該逆擊退見在投誠人
共二千餘名業將隨同打仗出力者分別獎賞該勇等無不急思
立功臣知賊內有湖北人詹啟綸一名人極強悍見已投出臣責
其不遵示早降鞭責一百令其趕緊立功贖罪再結以恩信必能
得其死力二十二日臣等派委文武督帶投誠勇目施紹恆等鼓
舞投誠各勇分路攻剿與慶祺營勇目王有明等搶入木城痛加
殄洗即將賊壘焚毀維時西連鎮賊壘經甯宗揚等攻其北面施
紹恆等攻其西面逆匪出巢抵敵該勇等奮勇向前短兵相接斬
擒無算割取耳級頭顱奪獲銅礮擡槍鳥槍刀矛旗幟甚多被焚
逆匪不知凡幾林瀛詳在東連鎮潛匿死守未敢救援二十四日
賊匪撲營當經我兵擊退是夜大股復向瑞昌營牆奔撲我兵俟
該逆逼近開放大礮副都統綿洵令濠內外義勇鈔出賊後該逆

力不能支始行敗退生擒賊匪三名割取首級七顆奪獲長梯八架刀矛旗幟等件甚多二十六日臣等飭派兵勇兩路進攻並豫傳嚴令若不攻破賊巢不准撤隊臣西凌阿帶領馬隊各處指揮策應侍郎瑞麟等督帶馬步各隊以壯聲威慶祺營義勇一千餘名進攻東連鎮因該處牆垣堅厚防守極嚴未能攻克員外郎瑞禧等督帶義勇進攻西連鎮直抵賊壘爭先拖拉樹柵一擁而進一面劈開柵門一面拋擲噴筒火彈登時四面火起義勇趁勢由北面殺進賊巢該逆猝不及防紛紛倒地焚燒連鎮街衢賊屍枕藉生擒賊匪十餘名奪獲大小黃旗槍礮刀矛等物多件義勇由北而南焚燒賊營三座林鳳詳恐河西一帶俱爲兵勇攻破即將河東槍礮運過河西林逆帶領強悍賊二千餘名踞住南面賊營死力抗拒維時已交申刻東北風大作兵勇攻戰六時之久俱已

疲乏卽撤隊回營見在西連鎮僅賸竈戶陳莊及西面一隅之地雖有死黨亦難久踞一有可乘機會卽當擣穴擒渠掃除羣醜鑲黃旗護軍參領松林中槍陣亡深堪憫惻應請照例賜卹以慰忠魂上諭內閣連鎮賊匪被剿窮蹙時思竄逸僧格林沁等派令各營兵勇分路進攻痛加剿洗賊勢益形窮蹙僧格林沁等務當無分晝夜悉力攻剿以期迅速肅清所有此次陣亡之護軍參領松林著交部照例議卹○諭軍機大臣等僧格林沁等奏焚毀西連鎮賊巢逆匪益形窮蹙一摺覽此次進攻情形尙爲得手西面賊營止存一座想不日卽可掃蕩我兵全占河西地面以全力併注河東辦理較易爲力林逆旣將東面槍礮移置河西則東連鎮賊巢愈形空虛我兵若能分路齊攻使該逆彼此不能相顧尤爲妥善各營官兵站牆巡濠固爲以逸待勞當此事機順利人心鼓

舞之時亟應飭令疊戰環攻速行進擊不可專恃投誠人等之力
該大臣等務卽督飭帶兵各員乘勝進剿剋日殄除以副朕望將
此由六百里加緊諭知僧格林沁並諭西凌阿知之○是月緩徵
山西歸化等三廳縣山東滕縣等十縣暨濟甯等三衛浙江海甯
等十二州縣三衛仁和等四場竈地河南鄭州等四十六州縣江
蘇橫浦等六場竈戶新舊額賦展緩直隸安州七州縣本年額賦
江蘇海門等六十六廳州縣暨蘇州太倉等八衛新舊正雜額賦
直隸河間等二縣本年糧租並賞吳橋等二縣災民一月口糧緩
徵江蘇川沙等五十一廳州縣本年漕糧給江蘇邳州等五州縣
並徐州等二衛被水災民口糧有差○是歲朝鮮琉球入貢○會
計天下民穀數除江蘇安徽湖南湖北福建廣東廣西等省未經
造報外直隸等省通其大小男婦二萬九千八百一十五萬二千

五百三名口存倉米穀一千八百一十萬三千五百六十六石二斗八升三合九勺